

YON

Livan imlavag gamag

¹ Wanamug gamag yagan Livan nises. Gamag towen yagan Livan waseg Yowbad nises. Gamag towen yagan Livan son Yowbad katanok-wan.

² Gamag towen yagan Livan son Yowbad wanamug nisesus.

³ Gamag towen yagan Livan youda babaw ibubun. Peinan Livan towen waseg, mo Yowbad nibun youd meivek-wan.

⁴ Mtowen taymovein youda babaw; mwamovan towen magina gamag yakids dakamnats.

⁵ Kamnat towen imteil ven dadub waseg. Dadub nag iyakous kamnat towen. Igawa nises.

⁶ Yowbad nikayeb gamag teitan, tabibaptaysein gamags, yagan Yon.

⁷ Yon neim; nawotet bikamtilakeids mo bitakines gamag towen ansinap kamnat, vagan kid babaw gamag mo bitasimounids waseg.

⁸ Yon nag kamnat tatonen; misinaka ikamtilakeids bitakines mtowen kamnat tatonen.

⁹ Mtowen kamnat moundid, immiteitl wasigeis gamag tatanok tatanok. E, mtowen bo neim ven watinow.

¹⁰ Im watinow, ven towen nibubun; tage ven watinow nag ikakins mtowen.

¹¹ Inekes inagamag, tage bo ipiyaves.

¹² Mwasanin gog bo itams waseg mtowen mo itames tasiyas, vagan bimplavags Yowbad nitun tasiyas, peinan isimounids mtowen Mesay waseg.

¹³ Nag ikopwes tasiyas, gamag buyvis waseg; nag. Nag ikopwes tasiyas peinan gamag sivines. Nag ikopwes tasiyas gamag sikaleiwag waseg; nag. Yowbad nakaleiwag waseg.

¹⁴ Livan towen im watinow, imlavag gimgilitoun, nisik davanuys. Nakakin mtowen singay takamnat, mamagina Taman Natun tatonen, singaya isiwayoub, ansinap moundid waseg.

¹⁵ Yon nikatimlakem, niwkuwak, ilana, “Mtowen livanen nalivan: ‘Igaw watibweloug teitan beim, bimug waseg yey. Yey babus, peinan tutan gunakabsilamaw waseg, mtowen igawa nises.’

¹⁶ “Mtowen guyaw avakaein; singaya ivvagein issekeids; nasiwayoub ikatitimweis bo ivakaein.

¹⁷ “Moses bo isekeids nakaleiwag; tage Yeisuw Kelis isiwyoubuds ansinap moundid waseg.

¹⁸ “Ta-kweitan tut gamag ikin Yowbad, nag. Tage Yowbad nipwakit Natun tatonen; mtowen nikatimlakeids Taman, mo takines.”

*Yon tabaptaysein gamags anilivan tonen
(Matiw 3:1-12; Mak 1:1-8; Luk 3:1-17)*

¹⁹ Wankuyeim gamag mwasanin inekes Yon ikatugans waseg, mo ikatimop asilivan. Peinan min-Yudiy tammwayas tasiyas misikes Yelusalem ikayabes tanuwgwes lun, sisiyas mwasanin Livay delen nimtakavates Yowbad nabunatum. Ikayabes tasiyas, inekes Yon, ikatugans waseg, ilansa, “Kal yakoum?”

20 Yon anilivan kamnat isek, ilana, “Yey nag Takatuneib Kelis, nag.”

21 Mo ikatiganes, ilansa, “Kal yak? Ilaytiy adok?”

Ilana, “Nag.”

Ilansa, “Adok yākoum palopit towen nakakayyamat?”

Ilana, “Nag.”

22 Mo idibakes, ilansa, “Kal yak? Livaneim aveiyag bukulivan, vāgan bakanow bakasekes tasiyas nikayabemas nakam?”

23 Iw to Yon, ilana, “Yey tawkuwak wana-woud vāgan bukukidumwālus daGuyaws inaked, māwan palopit Isaya nilivnek.”

24 Tasiyas Palisiy misikes Yelusalem, nikayabes gamag tasiyas nimeis ikatugans waseg Yon.

25 E, vayuwein tasiyas mo ikatiganes, ilansa, “Kukin yākoum nag Kelis yākoum, nag Ilaytiy yākoum, nag palopit towen yākoum, aveiyag wawun kubaptayses gamags?”

26-27 Yon ikatimop asilivan, ilana, “Yey abaptays yevagam waseg. Tage wanuwein yakamiy teitan nises, nag kukwakins kavel; watibweloug mtowen beim, tage nag kadilokeig bakulul wamatan vāgan kid bakablev nasandol, peinan mtowen singay iguyaw.”

28 Ilivan māwan Betaniy waseg, ven towen palata-dadan Yoldan. Ven towen waseg Yon nibaptayses gamags.

Kukines Lamiy Yowbad silmanin

²⁹ Neiyam-nen Yon ikin Yeisuw im, ilana, “Kukines Yowbad a_len la_miy mtowen lun bulukwan, beimat silma_nids ya_kids, vagan biwidids adsinaps kalbaleb waseg.

³⁰ “Mtowen li_vanen kweiboug nalivan, ‘Wat-ibweloug teitan beim, mtowen bimug. Yey ba_bus, peinan tutan gunakabsilamaw, towen igawa nises.’

³¹ “E, yey nag bakakin kavel towen, tage nam abaptayseimiy min-Yisleil yakamiy yevagam waseg, vagan bukukwakins guyaw towen.”

³²⁻³⁴ Wankuyeim li_vanen Yeisuw Yon mo ilivan; ilana, “Akin Kululuwan Yowbad ibus walba_lab im, magin ma_wana bwabun, iton Yeisuw wakunun. O yey nag bakakin towen, tage towen nikayabeig nam silma_nin babaptays yevagam waseg, towen nidibakeig, ‘Kukin kal Kululuwag beibus biton wakunun, mtowen tabaptaysein gamags Kululuwag Bwanabwein waseg.’ Yey bo akin, to adibakeimiy mtowen Yowbad Natun tatonen.”

Yeisuw idawes navamul mwasanin vagan bik-abwākuns waseg

³⁵ Neiyam-nen Yon mo itamanaws sen inavamul asteiy, itowas.

³⁶ Yon ikin Yeisuw ininoun, ilana, “Kukines Yowbad a_len.”

³⁷ Navamul asteiy iliganes, mo ikabwākuns Yeisuw waseg.

³⁸ Yeisuw itouvin, ikines tasiyas ikabwākuns waseg, mo ilana, “Aveiyag sivinamiy?” Tasiyas

gog, ilansa “O matovek, avanuy mukusik?” (Aga-Muyuw “matovek”, ages gog tasiyas “Labay”.)

³⁹ Ilana, “Kumeis taneis mo bukukines.” Siney mo ineis, ikines nakabmasis, ikaypuls sisiy, asibabaw imasis ven townen, peinan bo ikwayav.

⁴⁰ Yam townen asteiy tasiyas niliganes Yon anilivan, ikabwakuns Yeisuw waseg. Teitan yagan Andiluw inuw tuwan yagan Saymon Pita nises.

⁴¹ Nuwanaw in inineiv tuwan; iban mo ilana, “Saymon, bo kaban townen Mesay.” (Takativini gog yagan “Mesay” bein aga-Gilis “Kelis”.)

⁴² Andiluw mo itok tuwan inekes Yeisuw. Yeisuw ikabunik, mo ilana, “Yakoum Saymon, Yon natun yakoum; badokeim Pita.” (Takativini gog bein aga-Muyuw, “Dakul”.)

Idawes Pilip son Nataniyel

⁴³ Neiyam-nen Yeisuw sivinan bein Galiliy. In Galiliy mo iban Pilip, idibek, ilana, “Kwabkunig yey.”

⁴⁴ Andiluw son Pita siven Beteseid. To Pilip naven katanok-wan Beteseid.

⁴⁵ Pilip inek Nataniyel ilana, “Bo kaban Mesay; Moses nakaleiwag waseg nilel ilivnek mtowen beim bikatinabweids, o tasiyas palopits nileles ilivnakes livanen townen waseg; mtowen gum-Nasalet, yagan Yeisuw, taman yagan Yosep.”

⁴⁶ Nataniyel ilana, “Adok na-ikadilok youd bwanabwein beim ven to Nasalet waseg. Adok nag.”

Pilip ilana, “Kum, kukin.”

⁴⁷ Ineis; Yeisuw mo ikin Nataniyel imimeim, ilana, “Kukines taw towen ansinap bwein, nag bikatidev son, peinan gum-Yisleil moundid.”

⁴⁸ Nataniyel iligen anilivan, mo ilana, “Amawan nukukwakin yey?” Yeisuw ikatimop anilivan, ilana, “Igaw Pilip bidaweim bukum, bo akineim mukusik yaveinun wangwanan.”

⁴⁹ Nataniyel ilana, “O guntovek, moundid yakoum Yowbad Natun yakoum; min-Yisleil yakids imaking yakoum.”

⁵⁰⁻⁵¹ Yeisuw ikatimop anilivan, ilana, “Tayyaweid yak! Peinan adibakeim, alana, ‘Bo akineim yaveinun wangwanan’ mo kusimoundid. Sinap towen kakit; igaw tawtoun bukukin. Moundid adibakeim igaw bukukin libalab bikaliyow, Yowbad natakayobs mo bimnamwens o bibweibus Mesay Gingilitoun yey waseg.”

2

Sagal veivay silmanin ven Ken

¹ Yam akweiy ikous, mina-Ken mwasanin mo isagals, veivay silmanin. Ken wawnuwan ven avakaein Galiliy. Yeisuw inan in Ken silmanin sagal towen.

² Bo idawes-vak Yeisuw, sen navamul, ineis sagal towen silmanin.

³ Issagals ee... wayn bo ikous. Yeisuw inan mo idibek, ilana, “Asiwayn bo ikous.”

⁴ Iw to Yeisuw, ilana, “Adok mukwaleiwag towen; yey gunakaleiwag igaw.”

⁵ Yeisuw inan mo idibakes tanuwagan sagal navamuls, ilana, “Aveyag Yeisuw bidibakeimiy, kadiloka bukuwteles.”

⁶ Kunasoup nisesus kunanim kunatan, silmanin min-Yudiy biwidis nimes, kikeis; peinan asisinap mawan. Kunasoup kavkavek, vakanes mamagina gamag vakaeanan.

⁷ Yeisuw idibakes, ilana, “Kuvgwagwes kunasoup, yevagam waseg; mo ivgwagwes, in, ikalawt.”

⁸ Yeisuw mo ilana, “Kunasoup waseg kukilis, kukwawes kunawes tanawagan sagal waseg,” mo iwteles mawan.

⁹⁻¹⁰ Tanuwagan sagal ikamkwen yevagam townen bo imlavag wayn; nag bikakin avanuy meinoy neim, tage tasiyas takilins yevagam ikakins; tanuwagan sagal mo idow taveivay vagan beim bilivans son. Ilana, “Gamag babaw sagal nakabsilamaw waseg isekes wayn singaya bwein, imwamoums ee... iyakousis, wankuyeim mo isekes kalamwey wayn; tage yakoum amsinap kweitan, wayn bwanabwein kwayus, sagal nakabiyokous waseg mo kusekem kamoum.”

¹¹ Nakabsilamaw mulin naman Yeisuw nivag townen, ven Ken wawnuwan Galiliy, waseg ikatimlakes natawtoun, navamul mo isimounids waseg.

¹² Sagal townen ikous, mo iyum ineis Kapaneyum son inan, siney budan, o navamul. Nag biveiyov tut nisesus Kapaneyum.

*Ikawsapes taggimwals Yowbad wanbunatum
(Matiw 21:12-13; Mak 11:15-18; Luk 19:45-46)*

13 Min-Yudiy kakita bo bisagals, sagal towen vagan Kaltuwon. Mapun Yeisuw in Yelusalem.

14 Isap Yowbad wanbunatum iban̄es tasiyas tanuwgwes bulumakaw, o sip, o bwabun, nimeyes aleis v̄agan gamag babaw mo bigimwals wasigeis; sisiyas tasiyas takaweins money v̄agan bikatimapus dakul silmanin muloul Yowbad wanbunatum.

15 Yeisuw ikow vatul, ivkek inanew v̄agan bi-waway, mo ikawsapes, babaw isawls ineis watoulan. Ikawsapes aleis, ineis watoulan. Simoney itigabaw ininein wapwepway; siteibol ikatitan, ikalkalouw ikantanays.

16 Idibakes tanuwgwes bwabun, ilana, “Kuk-wawes, kunawes watoulan. Awoum kuvages Tamag nabunatum magina abgimwal.”

17 Navamul ikikines, mo inuwes Bukitab nilivnek mamagina,
“Bo iseiw nuwag mubunatum.”

18 Min-Yudiy mo ikatiganes Yeisuw, ilansa, “Namam mulin aveiyag bukwatimlakem v̄agan bakakakin mukwaleiwag, wotet towen silmanin?”

19 Yeisuw ikatimop asilivan, ilana, “Bukugulekwes bunatum towen, yam kweitoun mo bawlulavaw.”

20 Min-Yudiy ilansa, “Bweilim sinawavas kweinim katanok iwlules Yowbad nabunatum towen. Adok nag kadilokeim bukuwlulavaw kweitoun yam waseg.”

21 Tage Yeisuw nag ilivan livanen Yowbad nabunatum, ikabebay silmanin won tatonen.

²² Igaw tut wankuyeim mo ikanig, ikit vayuwein; ikous, navamul mo inuwes anilivan townen, mo isimounids Bukitab waseg, o isimounids Yeisuw anilivan waseg.

Yeisuw ikakina ninous gamag babaws

²³ Igaw nises Yelusalem, sagal townen Kaltuwon waseg, babaw gamag ikikines naman mulin mo isimounids waseg.

²⁴⁻²⁵ Tage Yeisuw nag isimounid wasigeis tasiyas, peinan ikakina gamag babaw asisinap. Nag kadilok teitan bikatimlek sinapun gamag, peinan ikakina gamag ninous.

3

Yeisuw son Nikodimos

¹ Palisiy teitan yagan Nikodimos, guyawun ven Yudiy.

² Mtowen inek Yeisuw, boug waseg, ilana. “Tamwey, kakakin Yowbad nikayabeim nukum kwatimlakem yakamey, peinan namam mulin kuvag mamagina Yowbad nawotet. Kukin nag Yowbad soum bilabeim, nag bukuwtel mawan.”

³ Yeisuw ilana, “Mounid anukweim, magat nag bikopweim vayuwein, nag bukukin Yowbad nakaleiwag, nag.”

⁴ Iw to Nikodimos, ilana, “Adok nag kal bikopweig vayuwein! Ta-mawan inag bikopweig vayuwein, peinan yey bo avakaein.”

⁵ Yeisuw ilana, “Yowbad Kululuwan kadilokena bikopweim! Mounid anukweim, kukin Kululuwan Yowbad nag bikopweim yevagam waseg,

ta-mawan bukusiw wanuwan Yowbad nakaleiwag. Tage kukin Yowbad Kululuwan bikopweim, bweina bukusiw wanuwan nakaleiwag.

⁶ “Gimgeilin inan bikop gimgeilin-wan; tage Kululuwan Yowbad bikop bo kululuwan-wan.

⁷ “Awoum bisunasun nanoum agulivan towen, ‘Kadiloka bikopweimiy vayuwein.’

⁸ “Yag ampalawen sivinan beitow, butkawan bukuligen, tage nag kukwakin avanuy meinoy neim, o bein avanuy. Mawana tasiyas Yowbad Kululuwan ikopwes.”

⁹ Nikodimos ikatimop anilivan, ilana, “Amawan youd tasiyas?”

¹⁰⁻¹¹ Yeisuw idibek, “Adok min-Yisleil wasigeis, yakoum takatimlakein gamags, yakoum; tage nag kukwakin youd siyas, ne? Mounid anukweim, aveiyag nakakakin youd siyas kanukweimiy, o yakamiy gog nag kusimounids.

¹² “Peinan ta-kusimounids agulivan, sinapun ven watinow waseg, ta-mawan bakatimlakeimiy sinapun libalab!

¹³ “Nag kadilok gamag beimwen bein walbalab. Misinak Gimgilitoun yey, bo alisow gunaven libalab, abus am watinow, kadilokeig bayum ban walbalab.

¹⁴⁻¹⁵ “Kweiboug wanawoud, Moses itamnow mwatet tanmunum, mawan magin igaw mo bitamnaweigs yey, Gimgilitoun yey, vagan kal yak bukusimounid waseg yey mo bukuban mwamovam bises bisigeg.

Mwamov bises bisigeg

16 “Singay Yowbad isiwyoubus ven watinow gimgilis. Natun gog anmwānet bo itam, bo isek vāgan bikatinabwes gamag. Kukin kal bisimounid townen waseg nag bigeg, nag; mwamovan son bises bisigeg.

17 “Yowbad ikayeb natun neim ven watinow nag silmanin biyateles gamag babaw, nag; nikayeb neim vāgan kid bikatinabwes gamag.

18 “Kukin kal bisimounid waseg Yowbad Natun, nag biyātal; nag. Tapiyaveins gog Yowbad Natun siyātal nises, peinan nag isimounids waseg Yowbad Natun anmwānet-wan, o peinan yagan ipiyaves.

19 “Silawun yātal townen, peinan kamnat bo isap im ven watinow; tage gamag ipiyaves, sivines kid dadub, peinan siwotet kalbaleb.

20 “Takalbalebs ipiyaves gog kamnat; nag bimeis kamnat waseg, peinan bo bimteil asisinap kalbaleb.

21 “Townen gog nawotet mounid bo bimek kamnat waseg, mo bimteil nawotet bwanabwein, niwwtel Yowbad waseg.”

Mtownen butun bivakaein; yey bābus

22 Wankuyeim Yeisuw sen navamul mo ineis wawnuwan ven Yudiy; misikes ven townen, ibibaptāyses gamag.

23 Yon gog misik ibibaptāyses gamag ven yagan Aynon, walasin Selim, peinan ven townen yevagam avakaein nises. Gamags imimeis mo ibaptāyses.

24 Nag iyousis Yon vāgan beisiw wādeil. Igaw.

²⁵ Yon navamul mwasanin mo ikamnimans sisiy gum-Yudiy teitan, idokes kalisiy sivkākay bwein vāgan biwid gamag sikalbaleb.

²⁶ Mapuna inekes Yon, ilansa, “Tamwey, taw townen nukwatimlakem, kulana, ‘Yowbad alen townen,’ kweiboug soum nukusesus ven townen niweiw, Yoldan nimeim; tut townen bo neim ibaptayses gamags, o gamag babaw ininekes.”

²⁷ Yon ilana, “Tanuwagan libalab takaleiwag inasiwayoub wasigeis yakids vāgan bitamwasaws. Townen anmwānet takaleiwag.

²⁸ “Yakamiy nukuliganes agulivan mamagina, ‘Yey nag Mesay Kelis; nag. Misinaka Yowbad nikayabeig amgwey mtowen Kelis.’

²⁹ “Mtownen, imwasaw māwana taveivay, peinan taveivay ikow inakwāv. Veiyon-vak imwasaw peinan ikin taveivay ikow inakwāv. Yey māwana veiyon townen, aligen aygan, amwasaw avakaēin, mtowen Yeisuw silmanin.

³⁰ “Butun mtowen bo bivakaēin; yey gog bo bābus.”

Mtownen meinoy neim walbalab

³¹⁻³² Mtownen meinoy neim walbalab, singay imug. Tage min-pwepway yakids mitanoys nitameis pwepway waseg, tallivans kid livānen ven watinow.

Mtownen meinoy neim walbalab singay imug; aveiyag wamatan nikin, o teigan waseg niligen, mo ikatimlakeids; tage babaw gamag ipiyaves anilivan.

³³ Kukin kal bo biligen anilivan, bisimounid, mamagina bo ikamtel Yowbad ansinap moundid.

³⁴ Mtowen Yowbad nikayeb neim, ikatim-lakeids Yowbad ansinap, peinan singaya ikatpel Kululuwan isek towen.

³⁵ Taman Yowbad sivinan Natun, youda babaw nisiwayoub waseg.

³⁶ Kukin kal bisimounid waseg Natun, mwamovan bises bisigeg; togo tapiyavein Natun nag biban mwamovan, peinan Yowbad bikavvikun waseg.

4

Yeisuw ilivans son nen-Samaliy

¹⁻³ Tasiyas Palisiy iliganes livanen Yeisuw peinan ibaptayses gamag babaw mo imlavags navamul; o iliganes livanen Yon ibaptayses gamag nag ibabaw; tage Yeisuw nag ibaptays, navamul gog ibaptayses gamags. Yeisuw ikakin ninous tasiyas Palisiy, mapuna ilisow Yoldan, inoun, vayuwein mo in Galiliy.

⁴ Ked towen waseg kadiloka bikanapel Samaliy mo bein Galiliy.

⁵ Isap gog min-Samaliy wasiven yagan Saykal, walasin pwepway towen Yekob nisek natun Yosep pwamug-o.

⁶ Yevagam towen kweiboug Yekob ikaviyeil. Yeisuw ininoun waked ee... mo isap, bo isoumat; isin wadadan yevagam.

⁷⁻⁸ Navamul ineis waven bigimwals kan. Bo yanay. Nen-Samaliy mo im beikil soup. Yeisuw idibek, ilana, "Soup kumey, bamoum."

⁹ Vin manawen mo ilana, "Adok yakoum gum-Yudiy yakoum. Aveiyag wawun kunitoug soup

waseg vinen-Samaliy yey?” (Peinan min-Yudiy isisinales min-Samaliy.)

10 Yeisuw ikatimop anilivan, ilana, “Magat bukukwakin Yowbad nasiwayoub, o magat bukukwakin kavel yey anitoug yevagam waseg yak, adok mo bukunitoug waseg yey vagan kid basekeim soup mwamov silmanin.”

11-12 Vin idibek, ilana, “Ta-kweitan mukwayagweg nises. Ta-manawan bukukil amsoup to kadiveiyov. Avanuy bukukil mo bukusekeig soup mwamov silmanin? Datoveks Yekob kweiboug guyaw avakaenin, nikaviyeil yevagam townen, imwamoum, alen imwamoums, nitun tibun imwamoums ee... igawa kamwamoum yakamey. Tabta yakoum bukumgwey tamwey townen Yekob?”

13-14 Yeisuw ilana, “Kalisiy beimoums soup townen, igaw vayuwein mo beivag asidak. Tage kukin kal beimoum soup townen yey basek, nag vayuwein beivag anadak; nag. Soup townen basek bimplavag mamagina yuwyeiwl bibwabwab wanuwan, silmanin mwamovan nag beikous.”

15 Vin manawan ilana, “O guyaw, soup townen kumey bamoum, vagan beikous agudak; awoum ge bamimeim bakilikil agusoup.”

16 Yeisuw ilana, “Kun kudibek mumwan, kumeis amiteiy.”

17-18 Vin manawan ikatimop anilivan, ilana, “Ta-ivag gunamwan.”

Yeisuw ilana, “Mounid amlivan. ‘Ta-ivag gunamwan.’ Adok mumwanas asteinim; townen gog

soum kusesus nag mumwan tonen, to amlivan moundid-wan.”

19-20 Vin manawen ilana, “O guyaw, akakin yakoum palopit yakoum. Tammwayas bo ikululs wamatan Yowbad koy towen waseg; min-Yudiy yakamiy kulansa, ‘Kadilokeids bitakululs Yelusalem waseg.’ ”

21 Yeisuw ilana, “Kadiloka kusimounid agulivan towen. Igaw nag bitakulul wamatan Yowbad koy towen waseg, o Yelusalem waseg, peinan kweivaw kaleiwag bo bisap.

22 “Yakamiy nag kukwakins aveiyag towen kukululs wamatan. Yakamey kakakin, peinan wawun katuneib nises wasigeis min-Yudiy yakamey.

23 “Igaw kweivaw sinap bisilamaw. Mounid bo isilamaw tut towen waseg, peinan tasiyas ikululs moundid wamatan Yowbad, kululuwes waseg bikululs, sitapw̄aloul moundid. Peinan Tamads sivinan sinap towen, waseg gamag bitapw̄alouls bwein.

24 “Yowbad kululuwan mav. Tasiyas gog sivines bikululs wamatan Yowbad, kadiloka kululuwes waseg bikululs, moundid-wan; awoum bikululs mav.”

25 Vin manawen mo idibek, ilana, “Akakin igaw Mesay beim, mtowen gamag mwasanin idokes Kelis. Igaw beim, mo bikatimlakeids youda babaw.”

26 Yeisuw ilana, “Mesay yey, mtowen nukulivans soum.”

²⁷ Iliwan ma^uwan ikous, navamul mo iyums imeis; bo isunasun ninous peinan Yeisuw ilivans son kudav^un; (peinan min-Yudiy idokes nag kadilok taw bilivans son vin watapwan ven); tage nag teitan ilana, “Aveiyag sivinam?” o nag teitan ilana, “Aveiyag wawun kullivans soum manawen vin?” nag. Ikikapays-wan.

²⁸⁻²⁹ Vin gog manawen bo ilisow nakunasoup, inoun in waven, idibakes gamags; ilana, “Kumeis taneis kukines gamag teitan nidibakeig agusinap babaw kweiboug navvag. Tabta mtowen Kelis?”

³⁰ Iliganes, mo ilisawes ven towen, inounas kid binekes Yeisuw.

³¹ Tage navamul bo nisimkakins waseg Yeisuw vagan kid beikam kan to nimeyes.

³² Togo Yeisuw ilana, “Yey kag nises. Yakamiy nag kukwakins.”

³³ Tasiyas ilansa, “Tabta kal-tan kan isek ikam?”

³⁴ Yeisuw ilana, “Yey kag nises. Bo bakanow Yowbad aygan, aveiyag sivanan, mo bayakous nawotet. To silmanin nikayabeig nam. Agusinap towen kag-wan.

³⁵⁻³⁶ “Adok yakamiy kulansa, ‘Kweivas tibukon mo bitatayoys kan.’ Tage kukin bikiplal mitamiy mo bukukines kan bo iyebwel, peinan bo imatuw. Tatayaweins kan ikawes maysan wotet, o itayoys anagin towen, gamag mwamoves nag beikous.

Mapuna mo himwasaws tasiyas tasapweins kan sisiyas tasiyas tatayaweins kan.

³⁷ “Livan towen moundid-wan, mamagina, ‘Tasapwein kan kweitan; tatayawein kan kweitan.’

38 “Yey akayabeimiy vagan bukutayoys bag townen. Mwasanin gamag niwteles bag, yakamiy nag; misinaka kutayoys-wan; tage bo niwteles nanawan.”

39 Ven townen Samaliy gimgilis babaw mo isimounids Yeisuw waseg, peinan vin anilivan, “Ni-dibakeig agusinap babaw kweiboug navvag.”

40-42 Min-Samaliy tasiyas mo inekes Yeisuw, ilansa, “Kum kuyeiwas wamaven, amabwabwal yakoum.” Itam. Siney tasiyas nisesus akweiy yam, iliganes anilivan. Iliganes, singay babaw mo isimounids waseg; idibakes vin manawen, ilansa, “Kaligen amlivan, kakit kasimounid; tage tut townen yakameyan-wan nakaligen anilivan, mo kakakin mound mtowen takatinabweids ven watinow gimgilis yakids.”

*Gabman natun Yeisuw ivag mo ibwein
(Matiw 8:5-13; Luk 7:1-10)*

43 Yam akweiy ikous mo ilisawes; inoun in Galiliy.

44 Yeisuw anilivan tonen mamagina, “Wanven tatonen nagamag nag biliganes palopit anilivan.”

45 Tutan isap Galiliy mo ibwein ninous min-Galiliy, peinan bo ineis Yelusalem, sagal silmanin, bo ikines Yeisuw nawotet sagal townen waseg.

46 Vayuwein mo in Ken, wawnuwan Galiliy, kweiboug nivag yevagam to mo imlavag wayn.

Gabman nises, natun ikatoun ven Kapaneyum waseg; natun kudataw.

47 Gabman townen iligen Yeisuw bo ilisow Yudiy, meinoy neim Galiliy; mapuna inek Yeisuw, ilana, “Kum, biten, natug kudataw kukin, bo ikatoun

avakaein. Adok kakita bikanig. Kuvag beibweïn.”

⁴⁸ Yeisuw ilana, “Magat bukukines wotet tawtoun, mamagina naman mulin Yowbad, mo bukusimounids. Kukin gog nag, bo nag.”

⁴⁹ Iw to Gabman, ilana, “Kum, kukin natug. Mata ge bikanig!”

⁵⁰ Yeisuw ilana, “Kuyum kun. Natum bo ibweïn.” Gabman mo isimounid peinan Yeisuw anilivan; iyum in silmanin naven.

⁵¹ Iwloubus ininoun ee... ilivatus natouwat mwasanin; bo nikatulags nimimeis, ilansa, “Natum bo ibweïn.”

⁵² Gabman ikatiganes, ilana, “Asinavin mo ibweïn?”

Ilansa, “Nov, yanay kansow, mo iloulun won. Ankatoun bo ikous.”

⁵³ Taman mo inuway nov yanay anatut kansow, Yeisuw nilivan, “Kuyum kun. Natun bo ibweïn”; mo isimounids sen nagamag asibabaw-wan.

⁵⁴ Tut townen Yeisuw nilisow Yudiy, meinoy neim Galiliy, naman mulin kwayuweïn ivag, peinan Gabman natun townen ivag mo ibweïn.

5

Yevagam wadadan ivag teitan mo ibweïn

¹ Kweitan tut wankuyeim, Yeisuw mo ikatulag in Yelusalem, min-Yudiy sisagal silmanin.

² Yelusalem waseg, yevagam kweitan; yagan ag-Ibliw “Beteseid”, sip sikoukwed walasin. Tavaḷel bunanim wadadan yevagam.

³ Bunsiyas bunatum takatouns immasis, ikayamats beibwab yevagam. Takatouns tasiyas ikaw

mites mwasanin, takagayals mwasanin, tasiyals ipams, takatounsa babaws-wan.

⁴ (-)

⁵ Kudataw teitan immasis, ankatoun nises bweilim sinwatoun kweinim kweitoun.

⁶ Yeisuw ikin taw townen, ikakin nagwadiven ankatoun nises, ilana, “Tab sivinam bukubwein?”

⁷ Takatoun ilana, “O guyaw, ta-mawan babwein. Igaw yevagam beibwab ta-kweitan gamag bilabeig vagan banuw waseg. Igaw bayokon banoun ban wayevagam, teitan gog bo imug in inuw.”

⁸ Yeisuw ilana, “Kutamanaw, kukow musag, kunoun.”

⁹ Nuwanaw taw townen mo ibwein, ikow nasag, inoun.

Yam townen Sādad, min-Yudiy siSābat, tapwāloul peinan.

¹⁰ Min-Yudiy ikines taw townen ikokew inasag, idibakes; ilansa, “Nagein Sābat. Nag kadilok bukukow musag.”

¹¹ Ikatimop asilivan, ilana, “Teitan gamag nivageig mo abwein mtowen bo idibakeig, ilana, ‘Kukow musag, kunoun.’ ”

¹² Ikatiganes, ilansa, “Kavel taw townen ni-dibakeim ‘Kukow musag?’ ”

¹³ Togo nag bikakin, peinan Yeisuw bo inoun; gamag singay babaw ven townen.

¹⁴ Wankuyeim Yeisuw mo iban taw townen Yowbad wanbanatum, idibek, ilana, “Yakoum bo kubwein amkwatoun waseg. Awoum amsinap

kalbaleb kuvag vayuwein; mata kalbaleb singay avakaein mo bukulouvat geg.”

¹⁵ Taw towen mo inoun inekes min-Yudiy tasiyas, ilana, “Mtowen Yeisuw ivageig mo abwein.”

¹⁶ Mapuna ikamliwes Yeisuw, peinan wotet towen niwtel yam Sabat waseg.

¹⁷ Yeisuw ikatimop asilivan, ilana, “Tamag yam babaw iwwotet ee... nagein gog igawa iwotet. Yey bo mawan, awwotet-wan.”

¹⁸ Mapun min-Yudiy singaya sivines beiweiys Yeisuw, idokes ansinap akweiya kalbaleb; kweitant igulek Sabat nakaleiwag; kwayuwein gog idok Yowbad Taman tatonen, mamagina idoki ansinap bo ikadilok tatonen.

Yowbad Natun nakaleiwag tonen

¹⁹ Iw to Yeisuw, ilana: “Yowbad Natun yey. Aw-wotet kadilokeig bawtel gunawotet tatoneig, ne? Tamag nawotet akin iwwtel. Aveiyag Tamag ivvag, Natun yey mo avag mawan. Nag kweitan tobwag wotet bawtel, nag.

²⁰ Tamag gog isiwayoub waseg Natun yey, nawotet babaw-wan aveiyag ivvag, mo ikatimlakeig Natun yey. Igaw singay tawtoun wotet mo bikatimlakeig Natun yey. Yakamiy bukukines, mo beisom ninoumiy.

²¹ Tamag ivag takanigs mo imovs vayuwein, mawan-vak Natun yey asekes simwamov, kalisiy sivinag.

²² “Tamag nag bikatukin bikaleiwag gamag sikalbaleb o sikamnabwein wasigeis. Kaleiwag

towen bo isekeig Natun yey, vāgan kid bakaleiwag gamag babaw wasigeis.

²³ Gamag babaw ivnāses Tamag, peinan Yowbad. Bo isekeig Natun yey gunakaleiwag towen vāgan kid gamag babaw mo bivnāseigs yey, māwan ivnāses Tamag. Kukin kal nag ivnāseig yey, māwan-vak nag ivnas Tamag, mtowen nikayabeig nam.

²⁴ “Mounid adibakeimiy, kal yak bukuligen aygag, o bukusimounid waseg towen nikayabeig nam, e, mwamovam bises bisigeg. Yowbad nag biyateleim, nag; peinan kanig bo kulisow, mwamovam bo kuban.

²⁵ “Mounid adibakeimiy, tut kadiyakus, nagein gog nises tut towen, tasiyas takanigs bo biliganes aygag, Yowbad Natun yey; e, kalisiy biliganes mo bimwamovs.

²⁶ Tamag tonen tamwamov, māwan-vak mwamovag tatoneig bo itam waseg Natun yey.

²⁷ O peinan bo amlavag Gimgilitoun, bo isekeig gunakaleiwag vāgan bamop gamag asisinap wasigeis.

²⁸⁻²⁹ “Awoum bisunasun ninoumiy peinan agulivan towen. Igaw tasiyas wakaluwngwes nisesus, igaw biliganes aygag mo bisaps; tasiyas siwotet bwein beikits waseg mwamoves bo bisigagas; tasiyas siwotet kalbaleb beikits vāgan kid bamop asisinap kalbaleb.

Tasiyas ilivans livānen Yeisuw

³⁰ “Nag kadilokeig aveiyag tatoneig bawtel; nag. Māwan baligen, māwan-vak bakaleiwag;

o gunakaleiwag didumwal. Peinan nag bakaleiwag nanoug tatoneig; nag. Nanon gog towen nikayabeig nam bakaleiwag.

³¹ Kukin livaneig balivan, nag balivan mound; nag.

³² Teitan gog livaneig nilivan; akakin geg mound anilivan towen.

³³⁻³⁴ “Nukukwayabes gamag mwasanin inekes Yon iliganes anilivan mound, mo ikatpeles isekeimiy. Livaneig bo isekeimiy. Tage nag ivag sivinag gamag asilivan livaneig waseg billivans, nag. Livan towen bo adibakeimiy vagan kid Yowbad mo bikatinabweimiy.

³⁵ “Mtowen Yon mamagina wodam, mititeilin avakaein waseg nigidaged, o bo ivag sivinamiy kumwasaws tut nag biveiyov mititeilin towen waseg.

³⁶ Livaneig Yon nilivan. Tage livaneig taw-toun nises waseg gunawotet, peinan gunawotet tawtoun. Wotet towen Tamag nisekeig bawtel beikous. Kukin kalisiy yakamiy bukukines gunawotet towen nawwtel mo bukukwakins Tamads nikayabeig nam.

³⁷⁻³⁸ “Tamag tonen livaneig nilivan. Yakamiy gog nag kweitan tut kuliganes aygan, o nag kukines magin, nag. Aygan nag bises wanimiy, peinan nag kusimounids waseg yey; Yowbad nikayabeig mo nam.

³⁹ Bukitab waseg kunineivs amisinap; kudokes kid bukubanes mwamovamiy towen bises bisegeg. Nag gog; livaneig yey nises Bukitab waseg.

⁴⁰ Kuvinis Bukitab, tage nag sivinamiy bukumekeigs vagan kid mo basekeimiy mwamovamiy towen.

⁴¹⁻⁴² “Nag ivag sivinag ven watinow gimgilis yakamiy bukuyakawaneigs, nag. Peinan akakina nag ivag misiwayoub waseg Yowbad.

⁴³ Yey nam Tamag yagan waseg, mo kupiyaveigs. Magat teitan beim yagan tonen waseg, adok bukutams gamag towen waseg.

⁴⁴ “Ta-mawan bukusimounids, peinan simsimiyas kuyakawaneimiy; tage nag ivag sivinamiy Yowbad anmwānet biyakawaneimiy.

⁴⁵ “Awoum kudokes bayateleimiy wamatan Tamag; nag. Townen Moses kunmises bilabeimiy, togo bo biyeteleimiy.

⁴⁶ Kukin bukusimounids Moses waseg, mapuna bukusimounids waseg yey, peinan townen Moses livaneig yey nilel.

⁴⁷ Peinan nag kusimounids Moses nakalelel waseg, ta-mawan bukusimounids agulivan waseg.”

6

Ivakamus gamags kweinim tawsan

(Matiw 14:13-21; Mak 6:30-44; Luk 9:10-17)

¹ Yeisuw anilivan townen ikous mo inoun in palata-dadan yevagam avakaein yagan Galiliy, yagan kweitan Tibeliyas.

² Singay babaw gamag ikikuns, peinan bo ikines naman mulin takatouns wasigeis, ivages mo ibweins.

³ Ikatulags koy kweitan, siney navamul, mo isinis.

⁴ Bo kadiyakus tutan sagal, min-Yudiy sisagal, yagan Kaltuwon.

⁵ Yeisuw mo itamnow matan, ikin singay gamag babaw bo nimeis, idibek Pilip, “Avanuy bitaymiyis kaeis tasiyas beikams?”

⁶ Ilivan mawan vagan biyakwen Pilip. Yeisuw bo ikakin aveiyag mo bivag.

⁷ Pilip ilana, “Bitaymiyis kan, lakatuy kina nag kadilok kakit gamag siyas katanok katanok beikams.”

⁸⁻⁹ Inavamul teitan, Saymon Pita bwadan, yagan Andiluw, mo ilana, “Gwad townen nises, anbled kekel kweinim, in mwanay; na-ikadilok gamag siyas singay babaw.”

¹⁰ Yeisuw ilana, “Kunukwes gamag babaw bisi-nis.” Ven townen awuyow babaw nisesus, mo isin-nis wakunuwatan awuyow, tawaw babaw, babi-weis mamagina kweinim tawsan.

¹¹ Yeisuw ikow bled townen, ikalin nuwan Yowbad waseg, mo ikikivis, isisekes inavamul, ivageins gamag babaw wasigeis, tasiyas isinis awuyow wakunuwatan. Asiyin mawan, mawan sivines mo isekes, ikams.

¹² Ikamuweips ikous, mo inukwes navamul, ilana, “Kusiyavis kan koubwag; awoum iyamkwen kan bises mav.”

¹³ Bled kweinim, gamag tasiyas kamkwam ikamwages, mo isiyavis; idagis wanuwan kaynad, bo ikalawt sinwatan kadiney kaynad.

¹⁴ O gamag tasiyas ikines naman mulin Yeisuw mwana nivag, mo ilansa, “Adok moundid palopit townen nitakaymates bo neim.”

15 Yeisuw ikakin gamag tasiyas sivines kid bimeis mo biyousis, binawes vagan bimlavag siking, mo inoun anmwānet-wan, ikatulag vāyuwein in wākoy.

*Inoun wakunuwatan yevagam
(Matiw 14:22-27; Mak 6:45-52)*

16-17 Kwayav waseg inavamul iwloubus ineis wakawalaw, inibwis siwag, mo ikalāvis bineis Kapaneyum, palata-dadan yevagam. Ibwages peinan bo idadub; tage Yeisuw ta-inekes.

18 Yag avakaein mo itow; kaysay ivag igegayous.

19 Ikalāvis ee... katanoka veit, mo ikines Yeisuw inoun wakunuwatan yevagam; bo isineikim, bo ivag aspwayat.

20 Iwage Yeisuw ilana, “Yey! Awoum kuweneigs!”

21 Sivines kid Yeisuw beitouw wāwag. Nuwanaw mo italags wasiven.

Yeisuw kan mwamov silmanin

22 Neiyam-nen gamag babaw igawa nisesus palata-dadan yevagam. Nov bo ikines katanoka wag wakawalaw; ta-kwayuwein nises; nag. Ikakins Yeisuw nag itouw sen navamul; siyas-wan itouws ikalāvis.

23 Tage Tibelijas wugwanen mwasanin mo ilugs kadilkusana ven townen Yeisuw nivakamus tasiyas, waseg kan townen ikalin nuwan Yowbad waseg.

24 Gamag tasiyas mo ikakins ven makaw; Yeisuw nag ises, navamul nag isesus. Mapuna itouws, ikalāvis ineis Kapaneyum, mo inineivs Yeisuw.

25 Ininineivs mo ibānes Yeisuw wayevagam wanpalatan townen, ilansa, “Tamwey, asināvin nukum?”

26 Yeisuw mo ikatimop ages, ilana, “Mounid adibakeimiy, nag kuneveigs peinan kukines namag mulin; nag. Bogo avakamumiy, kukwamuweips, to kuneveigs.

27 “Awoum kuwwotets peinan kan townen bipsapwas. Tage bweina kuwwotets peinan kan townen silmanin mwamovamiy nag beikous. Gimgilitoun yey basekeimiy kan townen. Tamag Yowbad bo ikatigikeig wotet townen silmanin.”

28 Iliganes, mo ilansa, “Aveiyag bakavag vāgan bakawtel Yowbad nawotet?”

29 Iw to Yeisuw, ilana, “Yowbad nawotet mamagina bukusimounids waseg yey, peinan nikayabeig nam.”

30-31 Tasiyas ilansa, “Namam mulin aveiyag bukuvag, vāgan bakakin mo bakasimounid. Tamumwey pwamug-o wanawoud kaeis yagan mana; livānen nises Bukitab waseg, mamagina, ‘Kaeis libālab avanin issekes, ikamkwams.’ Tage yakoum, aw-wotet bukuwtel?”

32 Yeisuw mo ilana, “Mounid adibakeimiy, Moses nag isekeimiy libālab avanin; tage Tamag bisekeimiy libālab avanin mounid-wan.

33 Kan townen meinoy neim walbālab vāgan Yowbad bisekeimiy mwamovamiy, ven watinow gimgilis yakamiy.”

34 Mapuna idibakes Yeisuw, ilansa, “O guyaw, kadiloka kussekem kan townen; tuta babaw bakakamkwam.”

³⁵ Yeisuw ilana, “Yey kan, mwamov silmanin; kal yak bukumekeig nag beivag amumoun; o kal yak bukusimounid waseg yey nag beivag amdak.

³⁶ “Kweiboug adibakeimiy, peinan nukukineigs tage nag kusimounids waseg yey.

³⁷ Gamag tasiyas Tamag bissekeig mo bim-mekeigs kid; o yey nag bapiyaves gamag tasiyas; nag.

³⁸ “Peinan yey bo alisow libalab, abus am ven watinow, silmanin bawotet nanon townen nikayabeig Tamag, nanoug tatoneig awoum.

³⁹ “Townen nikayabeig sivanan bisekeig gamag, o sivanan bikayus silmanin gungamag babaw tasiyas, nag tatanok bikabwag; o basekes mwamoves vayuwein, igaw nakabiyokous tut waseg.

⁴⁰ Tamag nanon bo manan. Kal yak bukukin Natun yey, o bukusimounid waseg yey, mwamovam yak mo bises bisigeg. Igaw nakabiyokous tut waseg, mo bavageim bukukit vayuwein.”

⁴¹⁻⁴² Yudiy gimgilis ivtokes livan Yeisuw, peinan ilana, “Yey libalab avanin, abus am watinow”; ilansa, “Adok townen Yosep natun, Yeisuw. Taman, inan takakins; aveiyag silawun anilivan, ‘Abus am watinow?’”

⁴³⁻⁴⁴ Yeisuw ikatimop asilivan, ilana, “Awoum simsimiyas kuvtokays livan. Misinaka takayabeig Tamag bibiteil gamag, mo bimekeig; nag teitan bimekeig mav; nag. Tasiyas bimekeigs bavages mo beikits vayuwein, igaw nakabiyokous tut waseg.

⁴⁵ “Palopit teitan nilivnek, anilivan nises Buk-
itab waseg mamagina,

‘Yowbad mo bikatimlakes tasiyas tababaws.’

Mapuna tasiyas biliganes Tamag aygan, bimulis
tasiyas, bikakins, mo bimekeigs, asibabaw-wan.

⁴⁶ Nag teitan bikin Tamag magin; nag. Misinaka
yey; peinan kweiboug soug Tamag nakases.

⁴⁷ “Mounid adibakeimiy, kal townen tasimounid,
mwamovan tonen nag beikous.

⁴⁸ “Yey kan mwamov silmanin.

⁴⁹⁻⁵⁰ Tammwayas siyas tibudayas bo ikams kan
yagan mana wanawoud; ikinkanigs. Tage kan
townen libalab avanin; bo neim watinow. Kukin
kal beikam, nag bikanig; nag.

⁵¹ “Yey libalab avanin, mwamov silmanin; kal
beikam waseg yey, mwamovan townen nag beik-
ous. Kan townen woug tatoneig, bo basekeimiy
ven watinow gimgilis silmanin mwamovamiy
yakamiy.”

⁵² Mapuna min-Yudiy mo ikamminimans
sisiyas; mwasanin ilansa, “Ta-mawan taw townen
bisekeids won tatonen bitakams.”

⁵³ Iw to Yeisuw, ilana, “Mounid adibakeimiy,
kukin nag bukukwams woug, Gimgilitoun yey,
ta-mawan bukumovs. Kukin nag bukumoums
buyavig, nag bukumovs; nag.

⁵⁴ Kukin kal beikam woug o beimoum buyavig,
mwamovan tonen bises bisigeg; igaw nakabiyok-
ous tut waseg, mo bavag gamag townen bita-
manaw vayuwein.

⁵⁵⁻⁵⁶ Peinan woug kan tonen, buyavig soup
tonen. Kukin kal beikam woug, o beimoum

buyavig, soug townen bakases, o yey bases waseg gamag townen.

⁵⁷ “Tamag Tamwamov nikayabeig nam; Tamag mwamovan waseg amov; mawan-vak kavel bikamwig mo bimwamov waseg mwamovag.

⁵⁸ Kan townen meinoy neim walbalab mound yey; nag mawan mana townen tammwayas ikamkwams, mo ikanigs; nag. Kukin kal bikamwig, mwamowan bises bisigeg.”

⁵⁹ Igaw ikatimlakay ven Kapaneyum waseg, ansinap townen igeiguy wanuwan sinagog.

Livanen mwamov bisigeg

⁶⁰ Navamul mwasinis ikatilutegs anilivan townen, ilansa, “Keikay sinap townen, ta-kal biligen.”

⁶¹⁻⁶² Yeisuw ikakina wananon inavamul bo ivtokes livan, peinan anilivan keikay, mapuna idibakes, ilana, “Tabta igeg ninoumiy, sinap townen, ne? Magat bukukines Gimgilitoun yey bayum bamwen ban walbalab, adok singaya bisunasun ninoumiy.

⁶³⁻⁶⁴ Yowbad Kululuwan bisekeimiy mwamovamiy; ta-mawan kalivimiy bilabeimiy; nag. Livan townen nasekeimiy, kululuwamiy o mwamovamiy silmanin; tage mwasanin yakamiy ta-kusimounids agulivan townen.” Peinan wanmugwana Yeisuw ikakin kalisiy bisimounids waseg, o kal bisilakod waseg.

⁶⁵ Ilana, “Peinan kweiboug adibakeimiy: Misi-naka Tamag beitam wasigeis gamag kalisiy bimekeigs. Nag teitan bimekeig mav.”

⁶⁶ Ilivan mamagin, navamul mwasinis mo ipiyaves, ilisawes, inounas.

⁶⁷ Yeisuw mo idibakes navamul sinawatan asteiy, ilana, “Sivinamiy-tan bukuneis yakamiy?”

⁶⁸⁻⁶⁹ Iw to Saymon Pita, ilana, “O guyaw, bakali-saweim, kal mo bakanek? Yakoum waseg livanen mwamovem bises bisigeg. Kasimounid o kakakin mounid yakoum Yowbad naMesay yakoum.”

⁷⁰⁻⁷¹ Yeisuw mo idibakes, ilana, “Bo adaweimiy, sinwatan amiteiy; tage Seitan nises waseg tatanok gamag.” Livanen towen Yudas, taman yagan Saymon Iskaliyot; mtowen waseg bod towen, igaw mo bisilkod Yeisuw.

7

Yeisuw budan nag isimounids

¹ Wankuyeim Yeisuw mo ininoun ven Galiliy waseg. Nag bininoun Yudiy waseg, peinan mwasanin Yudiy sivines kid bikatimates.

²⁻⁴ Kakita bisagals min-Yudiy sisagal towen waseg niwlules tava_lel. Budan Yeisuw mo idibakes, ilansa, “Kunoun kun Yudiy, v_agan kid muvumul mo bikines mukwawotet. Kukin kal bisesuna wanven bisowm nawotet, nag bi-vakaein butun tatonen. Yak ma_wan, kukin bukutawtoun, kadiloka gamag babaw bikines miwotet.”

⁵ Budan-vak nag isimounids waseg, mo ilivans ma_wan.

⁶ Yeisuw ilana, “Yakamiy bukuneis yam babaw bwein-wan, tage yey nag; igaw tutag waseg mo banoun.

⁷ Ta-mawan ven watinow gimgili bikamliweimiy; tage bo ikamliweigs peinan bo akamtel asisinap kalbaleb.

⁸ Yakamiy kukwatulags kuneis sagal towen, yey bases. Igaw tutag beibwein, mo baw.”

⁹ Ilivan ikous, isesuna ven to Galiliy.

Yeisuw Sagal Tawalel waseg

¹⁰ Yeisuw budan ikatulags ineis sagal towen. Yeisuw anmwānet mo inoun ivāpana nein, peinan nag sivanan gamag babaw bikakins.

¹¹ Min-Yudiy ininineivs Yeisuw sagal towen waseg, ilansa, “Avanuy misikey?”

¹² Gamag babaw ikatimwālags, livānen Yeisuw illivans. Mwasanin ilansa, “Taw towen kamnat.” Mwasanin gog ilansa, “Nag, peinan ikatidavidav gamag wasigeis.”

¹³ Tage asilivan kweitan kweitan, nag bilivans kamnat waseg, ikagsowums, peinan iwenes min-Yudiy situwāveks.

¹⁴ Watapwan sagal Yeisuw mo isiw in Yowbad wanbunatum, ikatimlakay.

¹⁵ Min-Yudiy mo isunasun ninous, ilansa, “Amawan nikakin ansinap towen, peinan tiskul avakaein.”

¹⁶⁻¹⁷ Yeisuw ikatimop asilivan, ilana, “Tagusinap tatoneig, nag. Towaen nikayabeig nam, ansinap tonen. Kukin sivanam bukuwtel Yowbad nanon, mo bukukwakins avanuy meinoy neim sinap towen, takinew Yowbad waseg, o takinew agusinap tatoneig. Bukuwtel Yowbad nanon mo bukukwakin.

18 “Kavel bilivan ansinap tatonen, sivinan kid bivakaein butun tatonen. Tage kukin kal bikanow natovek aygan, o sivinan butun natovek bivakaein, towen gamag kamnat, didumwal.

19 “Adok Moses nisekeimiy Yowbad nakaleiwag; tage nag teitan yakamiy bivnas nakaleiwag towen? Wawun sivinamiy bukuweigs?”

20 Iweis gamag babaw, ilansa, “Takabalawein yakoum! Nag kal beiweim! Adok Baloum bo iyousim.”

21 Yeisuw ikatimop asilivan, ilana, “Nawtel gunawotet bwanabwein katanok, S̄abat waseg, mo igeg ninoumiy.

22 Tage yakamiy kubwabwes apwaw momwan yam S̄abat waseg, peinan Moses nakaleiwag mawan. (Nakabsilamaw sinap towen tammwayas wasigeis, wankuyeim Moses anatut igawa ikokews sinap towen.)

23 “Peinan kubwabwes momwes S̄abat waseg, vagan nag bukugulekwes Moses nakaleiwag, aveiyag wawun kwavikuns takatoun navag neibwein S̄abat waseg?

24 Kakit kukwakins, kwaleiwags, kulansa, “Towen bwein; towen kalbaleb.’ Bo ibol mikaleiwag peinan nag kukwakins beibwein. Kadiloka kuneves silawun sinap vagan bukwaleiwags bwein.”

Tabta mtowen Kelis-tan?

25-27 Min-Yelusalem mwasanin iliganes anilivan, ilansa, “Adok gamag towen datuwaveks ininineivs mtowen, sivines kid bikatimates. Tut gog towen illivan wannat, o nag ikatimapus

aygan. Tabta moundid ikakins taw townen Mesay Kelis? Adok nag. Adok watinow gamag townen, peinan takakins avanuy meinoy neim; tage igaw Kelis beim, nag kal bikakin avanuy meinoy yay.”

²⁸ Igawa ikatimlakay Yowbad wanbunatum, aygan avakaein ilana, “Moundid kukwakins yey, o kukwakins avanuy manoy nam; tage teitan nikayabeig mo nam. Yey gunakaleiwag nag. Mtowen ikaleiwag, moundid ansinap kamnat; tage nag kukwakins mtowen.

²⁹ Yey akakin mtowen, peinan soug townen nakases, mo ikayabeig nam.”

³⁰ Iliganes anilivan townen, singaya igeg ninous, iyokons kid biyousis vagan biyateles, tage nag kadilokes peinan nag ilouvat Yeisuw inakanig tutan; igaw-wan.

³¹ Singay babaw gamag ikatilitegs, mwasanin gog isimounids waseg, ilansa, “Igaw Kelis beim, tabta nawotet bitawtoun mo bitamap waseg townen nawotet? Adok nag.”

I kayabes siplismans vagan biyousis Yeisuw

³² Gamag babaw livanen Yeisuw ikatimwalags manawan; tasiyas Palisiy mo iliganes; mapuna tasiyas Palisiy sisiyas tanuwgwes lun situwaweiks mo ikayabes siplismans vagan biyousis Yeisuw, yatal silmanin.

³³⁻³⁴ Yeisuw mo ilana, “Sigwey yakamiy basesun tut nag biveiyov, mo banek townen nikayabeig nam. Bukuneveigs, nag bukubaneigs; ta-manawan bukuwekeigs; nag.”

³⁵⁻³⁶ Min-Yudiy sisiyas mo illivans, ilansa, “Avanuy sivanan bein, mo yakids nag bitabanes.

Adok sivinan binekes sidayas min-Yudiy tasiyas misikes sisiyas kadiveiyov ven gimgilis, mo bika-timlakay tobwag ven gimgilis wasigeis. Wawun anilivan townen, ‘Bukuneveigs, nag bukubaneigs, ta-mawan bukuwekeigs?’”

Soup bilqtay mwamov silmanin

³⁷⁻³⁸ Yam townen, nakabiyokous sagal waseg, Yeisuw mo itamanaw, aygan avakaein ilana, “Kal yak amdak, kadiloka kumekeig kumoum. Kukin bukusimounid waseg yey, yakoum livanen Bukitab nises mamagina, ‘Lay kunus bilqtays gamag townen wanuwan, soup townen beibwab mwamov silmanin.’”

³⁹ Anilivan townen, livanen gog Yowbad Kululuwan, wasigeis tasiyas tasimounids waseg Yeisuw, peinan Yowbad mo bisek Kululuwan wasigeis tasiyas. Igaw Yeisuw bitawtoun avakaein, beiyum binek Taman, Kululuwan mo beibus bimekes gamag tasiyas tasimounids Yeisuw waseg.

Gamag babaw ninous kweitan kweitan

⁴⁰⁻⁴² Gamag mwasanin iliganes anilivan townen, ilansa, “Adok moundid townen palopit townen takaymates bimug Mesay waseg.” Tage gamag mwasanin ilansa, “Mtowen Mesay tatonen.” Mwasanin gog ilansa, “Mesay Kelis nag beinoy Galiliy. Adok nag. Peinan livanen nises Bukitab waseg, ilana, ‘Mesay natovek Deibid’ o ‘Mesay mo beinoy Betelem,’ Deibid naven tatonen.”

⁴³ Mapuna gamag babaw ilivis, mwasanin ninous kweitan, mwasanin ninous kweitan.

44 Mwasanin gog sivines biyousis Yeisuw, tage nag teitan iyous; nag.

Takaleiwags ven Yelusalem ipiyaves Yeisuw

45 Tasiyas plismans iyum inekes tanuwgwes lun situwaweks sisiyas tasiyas Palisiy. Situwaweks mo ikatiganes, ilansa, “Aveiyag wawun nag kuyousis Yeisuw?”

46 Iweis tasiyas plismans, ilansa, “Nag kweitan gamag anilivan mawan taw townen anilivan.”

47-49 Tasiyas Palisiy mo idibakes, ilansa, “Adok yakamiy-vak bo ikatidavimiy. Ta-kweitan guyaw isimounid waseg gamag townen; nag. Ta-kweitan Palisiy; nag. Tage tasiyas gamaga babaw, kaleiwag itagouwawes, isiplaves kaleiwag, mapuna Yowbad bimop sikalbaleb.”

50-51 Nikodimos sisiy tasiyas nisesus; kweiboug nilakwen Yeisuw; mtowen mo ilana, “Tab kadilok bitasilkodes taw townen? Adok nag. Dakaleiwags nises mamagina, wanmugwana bitakatiganes gamag, vagan kid bitakakins ansinap o nawotet amawan; ikous, mo bweina bitakaleiwags.”

52 Iweis tasiyas, ilansa, “Adok yakoum-vak gum-Galiliy yakoum! Kunev Bukitab wanuwan; ta-kweitan palopit bisap Galiliy waseg.”

53 Ikous, gamag tatanok tatanok mo inineis wasibwan tatineis.

8

Nqtan vin iyousis peinan ikanavaya mav

1 Yeisuw mo ikatulag in wakoy yagan Oliv.

2 Walalayis mo iyum in Yowbad wanbunatum; gamag babaw mo inekes, isin, ikatimlakes.

³ Takatimlakeins kaleiwag sisiyas Palisiy mwasanin mo imeyes natan vin nibanes bo imasis son teitan taw; vin manawen mo iseinis wanuwein.

⁴⁻⁵ Idibakes Yeisuw, ilansa, “Tamwey, vin manawen bo igeg ansinap. Na-imasis son namwan; nakaban imasis son tobwag taw. Moses nakaleiwag mamagina, kadiloka bitaweis dakul waseg vinay kalisiy ikanavaysa mav. Yakoum aveiyag bukulivan?”

⁶ Ilivans mawan vagan biyakwanes Yeisuw. Magat beibol anilivan, mo biyateles. Yeisuw gog istotow, naman waseg mo ilel wapwepway.

⁷ Igawa ivvaluts asilivan, ikatiganes Yeisuw, kaleiwag towen silmanin. Mapuna itamanaw, ilana, “Kal yakamiy ta-ivag ansinap kalbaleb, wanmugwana dakul bignilov, babaw yakamiy wankuyeim mo bukulivelovs, beimat.”

⁸ Ilivan ikous, vayuwein mo istotow ilelel wapwepway.

⁹ Iliganes anilivan, mo ininuways, tatanok tatanok mo inounas ineis, tamumwey imugwas, gamaga babaw wankuyeim. Ikous, asteiyun-wan nisesus son vin manawen itamanaw wamatan.

¹⁰ Yeisuw mo itamnow matan, ilana, “Vin yak, avanuy tasiyas tayateleims? Tabta beiweims?”

¹¹ Ilana, “Nag, bo ineis, asibabaw-wan.”

Yeisuw ilana, “Yey mawan; nag bayateleim; nag baweim. Kunoun kun. Awoum kuvgavaw amsinap towen kalbaleb.”

Yeisuw ven watinow gimgilis sikamnat

12 Vayuwein Yeisuw mo idibakes, ilana, “Yey ven watinow gimgilis sikamnat, yey. Kal yak bukwabkunig, dadub mo beikous maked waseg, peinan bo ivanoum mukwamnat, mwamovam silmanin.”

13 Tasiyas Palisiy mo idibakes Yeisuw, ilansa, “Nag kasimounid amlivan, peinan livaneim tatoneim.”

14 Iw to Yeisuw, ilana, “Livaneig towen alivan, bo moundid-wan; peinan akakin avanuy manoy nam o avanuy ban; yakamiy gog nag kukwakins avanuy manoy nam o avanuy ban.

15 Ven watinow sinapun waseg kukwaleiwags yakamiy; yey gog nag bakaleiwag wasigeis gamag mwasinis; nag.

16 Magat yey bakaleiwag, gunakaleiwag moundid-wan, peinan nag agmwanet bakaleiwag. Townen gog nikayabeig nam, Tamag, soug nakases. Mapuna makaleiwag moundid-wan.

17 “Livan nises wamikaleiwag tatineimiy mamagina: Magat asteiy gamag asilivan bilatans katanok-wan, asilivan bo moundid.

18 Livaneig amateiy nakalivan, soug Tamag nikayabeig nam.”

19 Tasiyas mo ilansa, “Avanuy Tamam?”

Yeisuw gog ikatimop asilivan, ilana, “Yakamiy nag kukwakins yey, o nag kukwakins Tamag. Magat bukukwakins yey, mo bukukwakins Tamag.”

20 Igawa Yeisuw ikatimlakay Yowbad wanbunatum, anilivan towen nilivan money Buntuman wanuwan; tage nag kal iyous, peinan nag ilouvat tutan bikanig. Igaw-wan.

Igaw ban ta-bukuwekeigs

²¹ Vayuwein mo idibakes, ilana, “Bo banoun mo bukunineveigs, nag gog; bo bukumtamats son amisinap kalbaleb, peinan ta-mawan bukuwekeigs.”

²² Min-Yudiy tasiyas mo illivans, ilansa, “Adok bo tonena bikatimet peinan ilana, ‘Ven townen ban, ta-mawan bukuwekeigs?’”

²³ Yeisuw gog idibakes, ilana, “Yakamiy watinow gimgilis yakamiy; yey gog wanakaew gimgeilin yey. Yakamiy miven townen watinow; yey gunaven kweitan.

²⁴ Bo adibakeimiy bukumtamats son amisinap kalbaleb. Kukin nag bukusimounids yey Mesay yey, mo bukumtamats son amisinap kalbaleb.”

²⁵⁻²⁶ Ilansa, “Kavel yak?”

Yeisuw ilana, “Mawan kweiboug nakatimlakeimiy. Kadilokeig livneimiy babaw balivan o bakaleiwag wasigeis yakamiy; nag gog, peinan townen nikayabeig nam ansinap townen mound, anilivan tonen naligen, assekeimiy ven watinow gimgilis yakamiy.”

²⁷ Yeisuw bo ilivan livanen Taman, tage tasiyas nag ikakins.

²⁸ Yeisuw ilana, “Igaw wakamweilok bukutamnaweigs Gimgilitoun yey, mo bukukwakins yey Mesay yey, o nag alivan gunakaleiwag tatoneig. Peinan Tamag nikatimlakeig mo alivan mawan anilivan tonen.

²⁹ Townen nikayabeig nam; soug townen nakases. Nag bilisaweig agumwanet bases. Peinan tuta babaw gunawotet bo ikadilok nanon waseg.”

³⁰ Tasiyas ikatilutegs anilivan towen, tage mwasanina isimounids waseg.

Sinap mound bitokeim bukun wamnat

³¹⁻³² Min-Yudiy mwasanin bo isimounids waseg Yeisuw, mo idibakes tasiyas ilana, “Kukin tut babaw bukwaninawes agulivan yey, gunavamul mound yakamiy. E, mo bukukwakins sinap mound, vagan kid bilikumiy bukuneis wamnat.”

³³ Ikatimapus aygan, ilansa, “Yakamey Ebelam delen yakamey. Nag kweitan tut nakases wadeil; nag. Aveiyag wawun amlivan, ‘Bilikumiy, bukuneis wamnat?’”

³⁴ Yeisuw ilana, “Mounid adibakeimiy, kal yak mukwawotet kalbaleb, mamagina tasiwun deil yakoum, peinan wanuwan dadub kuses.

³⁵ Tasiwun deil nag mawana tasiyas taginvens. Tage ven tanuwagan natun mo bises bisigeg.

³⁶ Magat Natun bitokeim tasiwun deil yakoum mo bukun wamnat, bo mound bukusesuna bukusigeg.

³⁷⁻³⁸ “Yey akakin Ebelam tibun yakamiy, tage sivinamiy bukuweigs, peinan aygag nag isiw ninoumiy wanuwan. Adibakeimiy sinap towen igaw soug Tamag bo nakin, tage nag kuliganes. Yakamiy gog nukuliganes tibumiy anilivan, mo kuvvages mawan.”

Yakamiy tibumiy Seitan

³⁹⁻⁴¹ Iweis tasiyas, ilansa, “Tibum Ebelam.”

Yeisuw ilana, “Magat Ebelam tibun yakamiy, mo bukuwteles Ebelam nawotet. Tage sivinamiy

bukuweigs yey, nasekeimiy livan moundid to naligen Yowbad waseg. Ebelam nag bivag ma_wan. Yakamiy kuwteles tibumiy nawotet.”

Iweis tasiyas, ilansa, “Inmayas nag ikanavays mav mo ikopwemas, nag. Yakamey tibum anmw_anet Yowbad.”

⁴² Yeisuw ilana, “Adok nag. Magat Yowbad tibumiy mo bukusiwyoubugs, peinan Yowbad waseg ma_noy nam. Yey gunakaleiwag nag; mtowen nikayabeig nam.

⁴³ Aveiyag wawun nag kukwakins agulivan? Adok peinan nag kadilokeimiy bukuliganes agulivan to_wen.

⁴⁴ “Yakamiy tibumiy Seitan; sivinamiy gog bukuwteles nanon tibumiy to_wen. Wanmugwana tawayin gamag to_wen; sinap moundid bo ipiyev, peinan ta-ivag ansinap moundid. Misikena tayyaweid to_wen, tuta babaw anilivan yaweid. Inada tayyaweid mtowen.

⁴⁵ “Yey gog, agulivan moundid, mapuna kupiyaves.

⁴⁶ Kal yak ikadilokeim bukwavte_g agusinap kalbaleb? Adok nag kavel. Kukin agulivan moundid, aveiyag wawun nag kusimounids waseg?

⁴⁷ Tage Yowbad angamag bo biligen anilivan. Yakamiy gog nag, nag bukuliganes anilivan, peinan to_wwag gamag yakamiy.”

Yey amug Ebelam ikuyeim

⁴⁸ Min-Yudiy tasiyas ikatimapus aygan, ilansa, “Adok moundid amalivan, ‘Ya_koum gum-Samaliy ya_koum, Baloum bo iweim.’ ”

⁴⁹ Yeisuw ilana, “Nag. Nag iweig Baloum. Bo avnas Tamag Yowbad, tage yakamiy nag kuvnaseigs yey.

⁵⁰ “Nag ivag sivinag yakawanag bivakaein, nag. Teitan gog sivanan yakawanag bivakaein; mtowen mo bikaleiwag.

⁵¹ Mounid adibakeimiy, kukin kal bivnas agulivan, nag bikanig, nag; bo bises bisigeg.”

⁵²⁻⁵³ Min-Yudiy tasiyas mo idibakes, ilansa, “Tut towen mounid kakakin Baloum bo iweim; peinan amlivan, ‘Kukin kal bivnas agulivan, nag bikanig, nag; bo bises bisigeg.’ Datoveks Ebelam bo ikanig. Tasiyas palopits kweiboug bo ikinkanigs ikous. Tabta bukulisow Ebelam, ne? Townen nikanig. Tasiyas palopits nikanigs. Kal yak kudok mugwamag nag bikanigs?”

⁵⁴⁻⁵⁵ Yeisuw ilana, “Magat bayakawaneig tatoneig, bo balivana makaw. Tage Tamag iyakawaneig, mtowen kudokes miYowbad. Tage nag kukwakins towen. Yey akakin. Kukin balivan, ‘Yey nag bakakin’ mo bamlavag tayyaweid mawana yakamiy. Mounid akakin towen, akanow aygan.

⁵⁶ “Tabuds Ebelam imwasaw peinan iligen tutag bo bam. Mamagin ikineig, mo imwasaw avakaein silmanig.”

⁵⁷ Min-Yudiy tasiyas mo idibakes, ilansa, “Yakoum ta-ivag ambweilim sinwanim, mo kulivan, ‘Bo akin Ebelam.’ Takabalawein yak!”

⁵⁸ Yeisuw ilana, “Mounid adibakeimiy, yey bo amug; Ebelam anatut wankuyeim.”

⁵⁹ Iliganes anilivan townen, mo ikawes dakul vagan kid beiweiys; tage Yeisuw ivalel gamag inoun, ilisow Yowbad nabunatum.

9

Toukwaw ivag matan mo ikin

¹ Yeisuw inoun waked, ikin taw teitan, kweiboug-o inan ikop ikaw matan, o bo ivakaen igawa ikawkwaw matan.

² Yeisuw inavamul ikatiganes, ilansa, “Tamwey, aveiyag silawun ikaw matan? Silawun adok peinan taman, inan asisinap kalbaleb, o adok taw townen peinan ansinap kalbaleb?”

³ Iw to Yeisuw, ilana, “Nawoum! Nag peinan taman, inan asisinap, o nag peinan ansinap townen kalbaleb mo ikaw matan, nag; tage silmanin Yowbad nawotet bikamat taw townen waseg, bo neikaw matan.

⁴ Tut townen mamagina wudayam, kadiloka bitawteles nawotet townen nikayabeig nam; igaw beiboug, nag teitan gamag biwotet.

⁵ Igawa nases ven watinow, gamag babaw sikamnat yey. Balisaweimiy mo bidadub mawana boug.”

⁶⁻⁷ Ilivan mawan ikous mo igiw wapwepway, giwun iyik, ilasipisoup pwepway, ikatipiyek matan taw townen, mo idibek, ilana, “Kun kuwid matam yevagam yagan Silowam.” [Wawun yagan townen “Kayob”.]

Iw gog, iwid matan, iyum im, matan bo ibwein.

⁸ Taw townen naven gimgilis mo ikines, sisiyas gamag tasiyas kweiboug nikines taw townen ininitoug waked, mo ilansa, “Adok townen taninitoug, tuta babaw nissin townen.”

⁹ Mwasanin ilansa, “Mtownen!”

Mwasanin gog ilansa, “Nag. Tobwag. Peinan magin maawan townen.”

Tage taw townen ilana, “Mounid yey!”

¹⁰ Ikatiganes, ilansa, “Amawan nukuvkek mo ikiplal matam?”

¹¹ Ilana, “Taw yagan Yeisuw igiw wapwepway, ilasipisoup, ikatipiyek matag, ilana, ‘Kun yevagam yagan Silowam, kuwid matam.’ An awid yevagam townen waseg, mo ikiplal matag.”

¹² Ilansa, “Avanuy taw townen?”

Ilana, “Seik-wan.”

Tasiyas Palisiy sivines bikakins silawun wotet townen

¹³⁻¹⁴ Gamag tasiyas mo itokes taw townen mwana neibwein matan, inawes tasiyas Palisiy wasigeis; peinan Sabat waseg Yeisuw neigiw wapwepway, ikatipiyek matan, mo ikiplal.

¹⁵ Tasiyas Palisiy mo ikatiganes taw townen, ilansa, “Amawan nukuvkek mo ikiplal matam?”

Ilana, “Gamag teitan ikow pwepway to bo ilasipisoup, ikatipiyek matag, awid, mo akin.”

¹⁶ Palisiy mwasanin mo ilansa, “Townen nag Yowbad nagamag. Peinan nag ivnas yam Sabat.”

Mwasanin gog ilansa, “Amawan takalbaleb biwtel naman mulin tawtoun, bwanabwein? Adok ta-mawan.”

Mapuna ilivis, peinan ninous kweitan kweitan.

17 Vayuwein mo ikatiganes taw townen, ilansa, “Taw townen nivag matam ibwein, ansinap amawan? Aveiyag bukulivan yakoum?”

Ilana, “Mtowen palopit.”

18-19 Min-Yudiy situwaweaks tasiyas nag isimounids townen toukwaw neibwein matan; idokes kid iyaweid. Mapuna idawes taman inan, imeis, ikatiganes vagan bisimounids sinap townen waseg. Ikatiganes, ilansa, “Tabta natun townen? Tabta ikaw matan igaw-o nukukop-yay? Amawan nagein mo ikiplal matan?”

20-21 Ilansa, “Mounid nitum townen; nakakop-yay-o neikaw matan; tage amawan nagein mo ikiplal matan nag kakakin, o kal ivag matan ibwein nag kakakin. Kadiloka tonena bilivan, peinan bo ivakaein; bweina kwatiganes.”

22-23 Taman, inan asilivan mawan, peinan iwenes min-Yudiy situwaweaks. Bogo nanawana sikaleiwag vagan gamag nag bilivans mtowen Mesay Yeisuw. Bilivans mawan mo bikayabes bineis watoulan sinagog; awoum ge bititapwalouls sisiyas. Situwaweaks sikaleiwag mawan, mapuna ivag aspwayat, inan taman, ilansa, “Bo ivakaeina tonen, kwatiganes.”

24 Vayuwein mo idawes taw townen mwana neibwein matan, idibakes, ilansa, “Kadiloka kulivan mounid wamatan Yowbad, peinan yakamey kakakin takalbaleb mto Yeisuw.”

25 Taw townen mo ilana, “Nag bakakin ansinap, kalbaleb, o nag, amawan? Misinaka akakin kweiboug neikaw matag, nagein gog akinbunik.”

²⁶ Iweis tasiyas, ilansa, “Taw townen amawan nivkek waseg yak? Amawan nivag matam nikiplal?”

²⁷ Ikatimop asilivan, ilana, “Bo adibakeimiy, tage nag kuliganes. Aveiyag wawun bavgavaw agulivan townen? Tabta yakamiy sivinamiy bukumlavags navamul yakamiy?”

²⁸⁻²⁹ Tasiyas gog mo iyages taw townen, ilansa, “Yakoum navamul yakoum; yakamey Moses navamul yakamey. Kakakin Yowbad nilivan waseg Moses; tage taw townen nag kakakin silawun ansinap.”

³⁰⁻³¹ Iwage townen ilana, “Weinadee...! Taw townen nivag matag ibwein; tage nag kukwakins silawun ansinap. Takakinsa Yowbad nag bilingen takalbalebs, iligen gog takanaweins aygan; tasiyas gog bivnases Yowbad nanon, Yowbad bilingen sikanitoug tasiyas.

³²⁻³³ Pwamug-o nag kal bivag vagan bikiplal matan townen nikop-yay waseg nikawkwaw matan. Magat nag Yowbad nagamag townen, ta-mawan bivkek wotet silmanin.”

³⁴ Tasiyas mo ikatimapus aygan, ilansa, “Mounid kweiboug nikopweims-yay sinap kalbaleb waseg; awoum kwatimlakem yakamey.” Mo ikayabes, inoun, in watoulan.

Tasiyas kululuwes ikaw

³⁵ Yeisuw iligen nikayabes taw townen, in watoulan tapwəloul. Ininineiv mo iban, idibek, ilana, “Tab kusimounid gimgilitoun Mesay waseg?”

36 Ilana, “O guyaw, kwatimlakeig gimgilitoun townen, vagan basimounid waseg.”

37 Iw to Yeisuw ilana, “Kukin mtowen, nukulivan soum.”

38 Taw townen mo ilana, “O guyaw, yey asimounid”; mo ikulul wamatan.

39 Yeisuw ilana, “Bo nam ven watinow silmanin kweitan kaleiwag; tasiyas toukwaws mo bikiplal mites, o tasiyas ikiplal mites mo bimlavags toukwaws.”

40 Palisiy mwasanin sisiy Yeisuw nisesus, mo iliganes anilivan townen, idibakes, ilansa, “Adok nukulivan, kulana, ‘Toukwaw yakamiy.’ ”

41 Iw to Yeisuw, ilana, “Magat toukwaw yakamiy, nag beivag amisinap kalbaleb; o peinan kulansa, ‘Kakakin-wan,’ to amisinap kalbaleb isesun-wan.

10

Asikal mansiyas sip

1-3 “Mounid adibakeimiy, kukin kavel bipiyev sip anakal awkwedan, tage inaked kweitan mo beisiw bein wanuwan, mounid tavveinaw mtowen. Tage townen beisiw wakoukwed waseg, adok mtowen tanuwagan alen sip. Takaymatein koukwed bikaliyow, alen mo bimgwayes binounas bineis.

4 “Mansiyas babaw-wan isunaps ikous, mo imgwayes inounas. Mansiyas sip ibukunis peinan ikakins sitovek aygan.

5 Nag bikikuns tobwag gamag waseg; nag. Peinan nag bikakins aygan; bo bisawls bineis, bilisawes.”

⁶ Yeisuw nakabebay towen, inganegs-wan, tage nag bikakins silawun.

Yeisuw mamagina tamtakavatein alen ansinap go bwein-wan

⁷ Vayuwein Yeisuw mo idibakes, ilana, “Mounid adibakeimiy yey koukwed silmanin sip beisiws bineis wanuwan.

⁸ Tasiyas tamtakavateins sip kweiboug tavveinaws tasiyas, tage sip nag iliganes ages.

⁹ “Yey koukwed yey. Tasiyas beisiws waseg yey mo bibanes sikabmwamov; bisesus bwein; tuta babaw bimimeis, binineis, kaeis bwanabwein bikamkwams, simwamov silmanin.

¹⁰ “Tasiyas tavveinaw imimeis vagan kid biveinaws, o biwaways, biyagages youd babaw. Yey gog nam mwamov silmanin, vagan kid bukumwamovsa singay.

¹¹ Yey tamtakavatein aleig, agusinap bwein; bo batam mwamovag bamat, silmanin aleig bimwamovs.

¹² “Kukin kal bisayin vagan bimtakovatay sip mo maysan wotet bikow, tage gamag towen nag bivnases beibwein, nag. Towen gog tanuwagan bivnases beibwein. Kukin kal bisayin silmanin wotet towen, igaw bikin bulawud awuk avakaein bo neim, mo bisawl, bilisawes mansiyas sip, peinan nag tanuwagan tatonen; bulawud awuk mo biyousis sip mwasanin, asibabaw bikati-gayays.

¹³ Towen gog bisawl bein, peinan nag tanuwagan; bweina maysan bikow wotet, tage nag binuway vagan bivnases bwein mansiyas sip.

¹⁴ “Yey tamtakavatein aleig, agusinap bwein. Yey akakin aleig. Tasiyas maʿwan ikakin yey.

¹⁵ Tamag maʿwan ikakin yey; yey-vak akakin Tamag. Bo batam mwamovag aleig pines.

¹⁶ Aleig nisesus ven mwasanin asikal kweitan kweitan; kadiloka bameyes tasiyas, mo biliganes aygag. Wanuwān asikal katanok mo bisesus asibabaws-wan; agumwaneta yey mo bamtakavates.

¹⁷ “Mapuna Tamag ikalin nuwan waseg yey, peinan bo atam mwamovag, vāgan kid vayuwein mo baban.

¹⁸ Nag kal bikow mwamovag, nag; tatoneig bo atam. Kadilokeig mwamovag basem; kadilokeig bakow vayuwein. Peinan Tamag nakaleiwag waseg yey bo maʿwan.”

¹⁹ Min-Yudiy tasiyas niliganes aygan towen, mo ilivis, mwasinis ninous kweitan, mwasinis gog ninous kweitan.

²⁰ Mwasanin ilansa, “Baloum bo iweiy, to nika-balaʿwein. Aveiyag wawun kuliganes aygan?”

²¹ Mwasanin gog ilansa, “Takabalawein aygan nag maʿwan anilivan towen. Tabta takabalawein bivag toukwaw vāgan bikiplal matan, ne?”

Min-Yudiy mwasanin ipiyaves Yeisuw

²² Tut towen bulbweilim, tutan sagal Yowbad nabunatum silmanin.

²³ Yeisuw ininoun wanuwān bunkakit wanuwān Yowbad nabunatum waseg. Bunkakit bunawen idokes Solomon nakwanow.

²⁴ Tasiyas min-Yudiy situwaweiks ikines Yeisuw ininoun, mo ikatuyouns inekes, idibakes; ilansa, “Kweivin yam bikubukub nuwem?”

Magat yakoum Kelis, kadiloka amlivan kamnat kudibakem.”

²⁵⁻²⁶ Yeisuw ikatimop asilivan, ilana, “Bo adibakeimiy, tage nag kusimounids. Gunawotet nawwtel Tamag yagan waseg bo bikatimlakeimiy kavel yey; tage yakamiy nag kusimounids, peinan yakamiy nag mamagina aleig yakamiy, magina tobwag sip yakamiy.

²⁷⁻²⁸ “Aleig tatoneig iliganes aygag, o yey akakin tasiyas; tasiyas-vak ibukunigs. Basekes simwamov bises bisigeg; nag aveiyag biyagages; nag. Takwekway nag bikwayes tasiyas; nag. Sigwey tasiyas bakasigeg.

²⁹ “Tamag bo isekeig gungamag tasiyas. Nag kal townen takwekway kadilok bikwayes Tamag waseg, peinan Tamag Tatawtoun tonen.

³⁰ Yey soug Tamag katanok-wan.”

³¹ Vayuwein mo ikawes dakul, sivines kid beiweisy Yeisuw.

³² Yeisuw mo idibakes, ilana, “Tamag bo isekeig gunawotet babaw bwanabwein, vagan bukukines; e, bo nukukines. Aw-wotet mapun bukuweigs dakul waseg?”

³³ Iweis tasiyas, ilansa, “Awoum bakaweim wotet bwanabwein mapun. Tage peinan kullivana mav, mamagina yak Yowbad yak, makava gamag yakoum.”

³⁴ Yeisuw ikatimop asilivan, ilana, “Adok lelel nises mikaleiwag waseg mamagina, ‘Bo alivan: yakamiy Yowbad mwasanin yakamiy.’

³⁵⁻³⁶ Livneis tasiyas kweiboug Yowbad nisekes aygan wasigeis, mamagina yowbad mwasanin tasiyas; o ta-mawan bitagidamis anilivan townen.

Tage kudibakeigs, kulansa, ‘Kulivana mav,’ peinan agulivan ‘Yey Yowbad Natun yey.’ Mounid gog Tamag nikayabeig nam watinow, nawotet silmanin.

³⁷ “Kukin nag bawtel Tamag nawotet, bweina bukupiyaveigs.

³⁸ Kukin gog bukupiyaveigs, tage bawtel Tamag nawotet, kadiloka bukukines gunawotet mo bukusimounids, vagan kid bukukwakins Tamag waseg yey nises, o yey Tamag waseg nases.”

³⁹ Vayuwein mo iyokons vagan biyousis Yeisuw, tage bo ilisawes, inoun in.

⁴⁰ Vayuwein mo in palata-dadan Yoldan, ven townen Yon nisilamaw nawotet kweiboug ni-baptayses gamag; ven townen Yeisuw misik-yay.

⁴¹ Gamag babaw ininekes, ilansa, “Yon ta-ivag naman mulin tawtoun, tage anilivan babaw, livanen Yeisuw, bo mounid-wan.”

⁴² Mapuna, ven townen waseg, namagleis gamag isimounids Yeisuw waseg.

11

Lasalos ikanig

¹ Takatoun teitan, gum-Betaniy yagan Lasalos; nunet asteiy Meliy son Malid wanven townen.

² Takatoun townen nunet Meliy naptumin Yeisuw kaken mul waseg, o natanabwein nawen kunun waseg.

³ Vinay tasiyas mo ikayabes teitan binek Yeisuw vagan bidibek, ilana, “Guyaw, gamag townen kusiwayoub waseg, bo ikatoun.”

4 Yeisuw iligen, mo ilivan, “Katoun towen nag silmanin kanig, nag; tage silmanin yakawanan Yowbad, vagan kid gamag mo bikavasis Yowbad Natun.”

5 Yeisuw nisisiwayoub wasigeis Malid son bwadan sisiy nusit Lasalos.

6-7 Yeisuw niligen Lasalos ikatoun, mo isesuna ven towen akweiy yam. Wankuyeim mo idibakes navamul, ilana, “Kumeis, bitayums taneis Yudiy.”

8 Iweis navamul, ilansa, “Tamwey, min-Yudiy bo iyokons sivines kid beiweims. Aveiyag wawun bukuyum bukun towen?”

9-10 Yeisuw ikatimop asilivan, ilana, “Katanok yam wudayam gaboug, yanay, kwayav. Kukin kal binoun wudayam waseg, nag bikatpines kaken kid bikalouw, nag; peinan ven nakamnat imiteil; tage kukin binoun boug waseg, adok bikalouw peinan ta-ivag nakamnat.”

11 Livan towen ikous, mo idibakes, ilana, “Veiyouds towen Lasalos bo imasis; ban Yudiy bavgun.”

12 Navamul idibakes, ilansa, “Kukin bimasis, mo beibwein.”

13 Idokes kid imasis kangagay; tage Yeisuw anilivan, “Bo imasis,” peinan bo ikanig.

14-15 Yeisuw mo ilivan kamnat, ilana, “Lasalos bo ikanig. Nag ikanig wamatag, tage bo ibwein nanoug pinamiy yakamiy vagan bukusimounids waseg yey. Bo bitanekes mtowen. Magat kweiboug nakases soug towen, mo bikanig, adok nag bukusimounids beibwein.”

¹⁶ Tomas, towen yagan kweitan Papap, mo idibakes siney, Yeisuw navamul tasiyas, ilana, “Kumeis, taneis; bitakanigs sods datoveks.”

Yeisuw kabmwamov tonen

¹⁷ Mtowen Lasalos bo ikanig, itakus, yam kweivas ikous, mo isap Yeisuw, iban bo itakus kweivas yam.

¹⁸⁻¹⁹ Peinan Betaniy kadilakus Yelusalem, mamagina katanok veit, min-Yudiy kalamwey babaw nimeis, ilakwanes M̄alid son Meliy, ikalin nuwes, ivvalams nusit peinan.

²⁰ Mwasanin idibakes M̄alid ilansa, “Yeisuw bo isap,” iligen manawen mo inoun, inek; Meliy gog igaw-wan wabunatum.

²¹⁻²² M̄alid iwekey Yeisuw, ilana, “E Guyaw, magat yakoum soum nagut bukusesus, adok nag bikanig; tage tut towen akakin aveiyag bukunitoug Yowbad waseg, mo bisekeim.”

²³ Yeisuw ilana, “Namut bo beikit vayuwein.”

²⁴ M̄alid ilana, “Akakin nagut beikit nakabiyokous tut waseg, peinan igaw nakabiyokous tut waseg, gamaga babaw mo bitakits vayuwein.”

²⁵⁻²⁶ Yeisuw idibek, ilana, “Yey mikabeikit yey; yey mikabmwamov yey. Kukin kal yak bukusimounid waseg yey, kukin bukukwanig, mo bukumov. Tababaw yakamiy bukusimounids waseg yey, mo bukumwamovs, kusesus kusigagas. Tabta kusimounid sinap towen, ne?”

²⁷ Ilana, “O, mound. Yey asimounid peinan yakoum Kelis, Yowbad Natun yakoum, mwana nukum ven watinow.”

Yeisuw ivlam

28 Ilivan ikous, mo iyum inek bwadan, katimwālag idibek, ilana, “Datoveks bo isap, idaweim yak.”

29 Iligen, nuwanaw itamanaw inoun inek Yeisuw.

30 Yeisuw ta-beim waven, igaw waked nises townen son Malid nilivatuy-yay.

31 Min-Yudiy tasiyas sisiy Meliy nivvālam, ikines Meliy nuwanaw itamanaw inoun, idokes kid bein wakalawag vāgan bivālam kid; mapuna ibukunis Meliy.

32 Meliy iw Yeisuw misik-yay, ikin, mo ikulul avakaein wamatan Yeisuw, ilana, “E Guyaw, magat yakoum soug nagut bukusesus, adok nag bikanig.”

33-34 Yeisuw ikin Meliy ivvālam sen min-Yudiy tasiyas nibukunis, singaya igeg nanon, ilana, “Takanig avanuy mukutakus-yay?”

Ilansa, “Kum, kukin.”

35 Yeisuw mo ivālam.

36 Min-Yudiy tasiyas ikines Yeisuw ivālam, ilansa, “Singaya ikalin nuwan takanig waseg.”

37 Mwasanin gog ilansa, “Townen nivag tasiyas toukwaws mo ikiplal mites, adok ikadilok bikatinob ankatoun waseg veiyon townen vāgan nag bikanig.”

Iyamov Lasalos

38 Vayuwein mo igeg nanon Yeisuw, inoun in wakalawag. Alawag gog takunumwan, dakul avakaein wawadon.

39 Yeisuw ilana, “Kuyatpinis dakul townen.”

Takanig nunet yagan Malid ilana, “E Guyaw, adok awoum; peinan bo ibog; kweivas yam nimsik wakalawag.”

⁴⁰ Yeisuw ilana, “Bo adibakeim, kukin bukusi-mounid waseg yey, mo bukukin Yowbad natawtoun.”

⁴¹⁻⁴² Ilivan ikous, iyatpinis dakul, Yeisuw mo itamnow matan, ilana, “Tamag, kalin nuwag peinan nukuligen aygag. Akakin nukunganeg aygag yam babaw; tage bo alivan mawan vagan tasiyas nitamanaws wadadag mo bisimounids kid yakoum nukwayabeig nam.”

⁴³ Initoug ikous, iwak, aygan avakaein ilana, “Lasalos, kume!”

⁴⁴ Takanig sona tibtabwan isunap, namana kaken bo iyawanis kweim waseg, o magin bo isimweilis kweim waseg.

Yeisuw mo idibakes, ilana, “Kulikus won vagan binoun.”

Sivines kid beiweiyis Yeisuw

⁴⁵ Min-Yudiy tasiyas tavvalams sisiy Meliy bo ikines Yeisuw nawotet townen, mwasanin bo isimounids waseg.

⁴⁶ Tage mwasanin inekes tasiyas Palisiy mo ikamteles Yeisuw nawotet townen.

⁴⁷⁻⁴⁸ Tanuwgwes lun situwawek sisiyas tasiyas Palisiy mo idawes takaleiwags babaw bimeis, ilansa, “Aveiyag bitavages, peinan taw townen nawotet singay tawtoun? Kadiloka bitabwawes nawotet; kukin gog nag, gamag babaw mo bisimounids waseg, mo bigeg ninous Gabman tasiyas mina-Lom; adok bimeis biyagages davanuys townen, mo biyakousis gamag yakids.”

49-50 Teitan yagan Kayapas, bweilim towen nawotet tanuwgwes lun sitovek avakaein, towen mo ilana, “Adok tatagouwaws yakamiy. Adok nag kukwakinsa bo kadilok tatanok gamag bikanig, gamag babaw pines. Awoum biyagageids bod Yudiy yakids.”

51 Nag ansinap tonen anilivan towen; tage peinan bweilim towen nawotet tanuwgwes lun sitovek avakaein, mo ilivnek Yeisuw bikanig asi-bod peinan.

52 O nag kid bod Yudiy peinan, nag; Yeisuw gog bikanig pines Yowbad angamag vena babaw wasigeis, vagan kid mo himlavags bod katanok.

53 Yam towen, tasiyas mo isilamaws ininuways amawan mo bikatimates Yeisuw.

54 Yeisuw nanon ilana, “Awoum vayuwein bikineigs min-Yudiy”; mapuna inoun in walasin makava nawoud, misikes ven Epleim sen navamul.

55 Tut kayakus min-Yudiy mo bisagals Kaltuwon silmanin, vena babaw gimgilis ikatulags ineis Yelusalem sagal towen silmanin, sivines kid bikatinagesa tatineis Yowbad nawotet towen silmanin.

56 Tasiyas ineis Yelusalem, sivines kid bikines Yeisuw. Ititamanaws Yowbad wanbunatum, illivans mamagina, “Waninoumiy aveiyag? Towne Yeisuw beim sagal silmanin, ne?”

57 Tanuwgwes lun situwawek sisiyas tasiyas Palisiy bo isekes sikaleiwag, ilansa, “Kukin teitan gamag bikakin avanuy Yeisuw misik-yay, kadiloka bikatimlakem vagan bakayous.”

12

Meliy iptum kaken Yeisuw, ven Betaniy waseg

¹ Yam kweinim katanok mo bisilamaws Sagal Kaltuwon, Yeisuw inoun in Lasalos wanven Betaniy, mtowen kweiboug nikanig Yeisuw ivag mo neikit.

² Yeisuw inekes, mo ivages kan; Malid ikokew kan silmanin Yeisuw sen tawaw beikams. Lasalos siney tasiyas ikamkwams.

³ Meliy mo ikow kwavitanok tagon yagan nad, maysan singay avakaein, iptum kaken Yeisuw, wanaman mo ikow kunun tonen vayvayov, itanob Yeisuw kaken. Nad townen simsiman bo ikalawt bunatum.

⁴⁻⁵ Navamul teitan Yudas Iskaliyot igaw bisilkod Yeisuw, mtowen mo ilivan, ilana, “Aveiyag wawun iyamkwen nad? Maysan townen kadiloka biyamiyis lakatutoun kina; money bitakow, bitavgen tasimavs wasigeis.”

⁶ Anilivan manawan, nag sivanan bilabes tasiyas tasimavs; nag. E, peinan tavveinaw townen Yudas, nawotet imtakavatay simoney Yeisuw sen navamul, ivveinaw waseg.

⁷⁻⁸ Yeisuw ikatimop anilivan, ilana, “Awoum kukwanan waseg manawan vin; nawotet townen silmanin gunakanig. Tasiyas tasimavs tuta babaw simiyas nukusesus, tage yey nag, igaw kakit mo balisaweimiy.”

Sivines kid beiweiyas Lasalos

⁹ Min-Yudiy iliganes Yeisuw nises Betaniy, singay babaw tasiyas mo imeis, sivines kid bikines, o

bikines-vak Lasalos, peinan nikanig, Yeisuw ivag mo ikit.

¹⁰⁻¹¹ Tanuwgwes lun situwaweaks mo ininuways, ilansa, “Amawan bitaweiys Lasalos, peinan min-Yudiy babaw Lasalos bo ikines mo ilisaweids, inekes Yeisuw, mo isimounids waseg.”

*Yeisuw isiw Yelusalem wanuwan
(Matiw 21:1-11; Mak 11:1-11; Luk 19:28-40)*

¹² Neiyam-nen gamag babaw tasiyas nikatuy-ouns nimeis Yelusalem silmanin sagal, mo iliganes Yeisuw bo neim.

¹³ Mapuna ikawes molay, inounas vagan kid binekes Yeisuw, iwkuwaks, ilansa, “Osana! Kalin nuwem yakoum, nukum Yowbad nawotet silmanin, min-Yisleil daguyaws yakoum.”

¹⁴⁻¹⁵ Yeisuw iban donkiy, imwen wakunuwatan, inoun, mawan Bukitab nilivnek mamagina, “Awoum beivag amipwayat min-Sayon yakamiy! Kukines miking bo neim, Isin watapwan donkiy natun.”

¹⁶ Misumkwey towen navamul na-ikakins Bukitab nilivnek Yeisuw nawotet towen; wankuyeim gog Yeisuw iyum in walbalab mo inuwes livan towen, livanen Yeisuw nawotet peinan bo ikamat mawana nilivnek.

¹⁷⁻¹⁸ Gamag mwasanin nikines Yeisuw nidow takanig Lasalos igaw wawalawagan nises mo isap son mwamovan, gamag tasiyas mo ikamteles sinap towen wasigeis gamaga babaw sisiyas; mapuna inekes Yeisuw, peinan iliganes livanen nawotet towen tawtoun.

¹⁹ Tasiyas Palisiy iliganes gamag babaw ninekes Yeisuw; sisiyas mo illivans, ilansa, “Bo

igak! Amawan bukuvkakes? Gamag tababawsa ininekes mtowen Yeisuw.”

Min-Gilis sivines bikines Yeisuw

²⁰ Min-Gilis mwasanin nimeis Yelusalem sagal towen silmanin, sivines kid bitapwālouls Yowbad waseg.

²¹ Yeisuw navamul Pilip nises Yelusalem, inaven Beteseid wawnuwan Galiliy, min-Gilis tasiyas mo inekes Pilip, ilansa, “Tamwey, sivinem bakakin Yeisuw.”

²² Pilip in idibek Andiluw; Andiluw son Pilip ineis idibakes Yeisuw.

²³ Yeisuw mo idibakes tasiyas, ilana, “Gimgilitoun yey, bo neim tutag balivet yakawanag tatoneig.

²⁴ Mounid adibakeimiy, kukin kaytul wit nag bein wapwepway bo bisesuna anmwānet; tage kukin bein wapwepway, bikanig mo beivag anagin babaw.

²⁵ “Kukin kal sivilan mwamovan, mo biyamkwen mwamovan tonen; tage bipiyev mwamovan ven watinow, mo biban mwamovan tonen bises bisigeg.

²⁶ “Kukin kal yak sivilam bukumlavag gunavamul, kadiloka bukwabkunig; mo soug yak bitases. Tamag bo bikalin nuwan yakoum, gunavamul yakoum.

Igaw mo bitamnawes Yeisuw kaligweg waseg

²⁷ “Tut towen bo igeg nanoug. Tabta banitoug, balana, ‘Tamag, kwatinabweig; awoum tut towen bakanig.’ Adok nag, peinan wotet towen silmanin bo nam.

28 Tamag, kuvag vāgan gamag babaw bikavasims, peinan yak Tatawtoun yak.”

Walbalab aygan mo ikatilutegs, ilana, “Bo avag; igaw mo bavgavaw, yagag yakawanan peinan.”

29 Gamag mwasanin nitomos idokes kid palapal. Mwasanin gog ilansa, “Gum-libalab nidibek Yeisuw, anelos adok.”

30 Yeisuw ikatimop asilivan, ilana, “Aygan towen nag peinag yey; tage aygan towen pinamiy yakamiy.

31 Tut towen Tamag bo bimop sinap kalbaleb wadaban pwepway. Tanugwagan ven watinow towen Seitan, Tamag bo bikayeb.

32 Igaw bitamnaweigs wakaligweg mo babiteilis gamag babaw bimeis waseg yey.”

33 Yeisuw anilivan towen vāgan bikatimlakes amawan bikanig.

34 Gamag babaw ikatimapus aygan, ilansa, “Kakakin Bukitab ilivnek Mesay bo bises bisigeg; aveiyag wawun amlivan ‘Kadiloka bitamnaweigs wakaligweg, gimgilitoun yey’? Gimgilitoun yak muwotet amawan?”

35 Iw to Yeisuw, ilana, “Tut nag biveiyov kamnat bises wasigeis yakamiy. Tut towen kadiloka bukounas; igaw bidadub, ta-mawan bukuk-wakins ked.

36 Igaw nases, mikamnat bo ivanoum; kadiloka kusimounids waseg, vāgan bukumlavags gamag kamnat yakamiy.”

Yeisuw ilivan ikous, mo inoun in, itoupan vāgan nag bibanes.

Min-Yudiy na-isimounids

³⁷⁻³⁸ Tasiyas nikines Yeisuw nawotet singay tawtoun; tage nag isimounids mtowen Mesay; to nikamat palopit Isaya anilivan, kweiboug nilivnek mamagina:

“E, Guyaw, kal bisimounid youd to nakalivan? Kalisiy bo ikines Yowbad natawtoun?”

³⁹⁻⁴⁰ Mapun ta-mawan bisimounids, peinan Isaya vayuwein nilivnek, ilana,
 “Bo ivag mites ikawkwaw,
 bo ivag tiges ikakon tasiyas;
 mata mites beikins;
 mata ninous bikakins;
 mo bikanavin ninous bimekeigs,
 vagan kid beibweins tasiyas.”

⁴¹ Anilivan towen Isaya nilivnek, peinan matan isisawl, ikin Mesay natawtoun, livanen mo ilivan.

⁴²⁻⁴³ Min-Yudiy gog takaleiwags mwasanin isimounids waseg Yeisuw, tage nag bikamteles ninous, peinan iwenes tasiyas Palisiy, idokes bibwabwes sitapwaloul. Tasiyas nag ivnases Yowbad, ivnases gamag ninous; sivines kid gamag bikavasis, Yowbad nag.

Gamag biyatals Yeisuw anilivan waseg

⁴⁴ Yeisuw iwak, aygan avakaein ilana, “Kukin kal bisimounid waseg yey, nag go isimounid waseg yey, tage isimounid waseg Townen nikayabeig nam.

⁴⁵ “Kukin gog kal bikineig, bikin-vak Townen nikayabeig nam.

⁴⁶⁻⁴⁷ “Yey nam watinow silmanin mikamnat. Kal yak bukusimounid waseg yey, mo beikous mudadub. Kukin bukwatiligen aygag, tage

nag bukuvnas aygag, yey nag bamop amsinap kalbaleb, nag. Peinan nag am watinow vagan bayateleimiy ven watinow gimgilis yakamiy, nag; nam gog vagan kid bakatinabweimiy.

48 “Kukin bukupiyev aygag tatoneig, o bukupiyaveig yey, igaw nakabiyokous tut waseg, aygag kakawen biyateleim, mo bukulivet mapun amsinap kalbaleb.

49 “Yey nag alivan agulivan tatoneig, nag. Tamag bo ikaleiwag. Tamag gog nikayabeig, nam watinow, mo alivan, mawan nakaleiwag tonen.

50 “Yey akakin nakaleiwag townen silmanin mwamovamiy nag beikous. Tamag nakaleiwag waseg isekeig aygan, mo alivan mawan.”

13

Yeisuw iwik inavamul kikeis

1 Igaw kakit mo beikams Sagal townen Kaltuwon. Yeisuw ikakin-wan tutan bo ilivet beinoy ven watinow, beiyum binek Taman. Tuta babaw issiwyoubus angamag tonen; nakabiyokous tutan Yeisuw watinow mo bikatimlakes nasiwayoub singay wasigeis tasiyas.

2 Sagal townen ikamkwams sen navamul. Saymon natun Yudas Iskaliyot nises. Kweiboug Seitan nanon isek Yudas vagan kid bisilkod Yeisuw.

3 Yeisuw ikakin-wan Taman bo itam youda babaw waseg. Ikakin meinoy neim Yowbad waseg, mo beiyum-vak binek Yowbad.

4-5 E, Yeisuw mo itamanaw, inis anakweim mwaynavakaein, taweil isikam, mo iligob soup in

wanuwan abmavin, isilamaw biwkiwik navamul kikeis, bititanob taweil townen nisikam waseg.

⁶ Iwik kikeis mwasanin gamag ikous, mo inek Saymon Pita. Pita ilana, “Yak guyaw; awoum kuwik kakeig.”

⁷ Yeisuw ilana, “Nag kukwakin silawun gunawotet townen; igaw mo bukukwakin.”

⁸ Pita ilana, “Nag. Nag kweitan tut bukuwik kakeig.”

Yeisuw ilana, “Kukin bukupiyev, nag veiyoug yak.”

⁹ Saymon Pita ilana, “Gunguyaw yak, bweina kuwik kakeig son namag o kunug.”

¹⁰ Yeisuw ikatimop aygan, ilana, “Deis. Kal yak bo kukwākay ikous, misinaka bawik kakeim mo bigimagim woum meivek-wan. Yakamiy gimagim yakamiy, tage teitan yakamiy nag.”

¹¹ Yeisuw ikakin kal bisilakod waseg, to ilana, “Teitan yakamiy nag.”

¹²⁻¹⁴ Iwik kikeis ikous, ivaligev anakweim, isin wakaban, idibakes, ilana, “Tabta kukwakins gunawotet townen wasigeis yakamiy? Kudokeigs ‘Amatakatimlakay’ o ‘Maguyaw’; bwein māwan, moundid-wan. Kukin yey amitakatimlakay o miguyaw yey bawik kikeimiy, kadiloka kulabes simsimiyas mamagina kuwkiwiks kikeimiy simsimiyas wasigeis.

¹⁵ “Bo akatimlakeimiy agusinap wasigeis yakamiy; kadiloka kuvages māwan.

¹⁶ Moundid adibakeimiy nag kal bikaleiwag naguyaw waseg, o guyaw teitan natakayob awoum bikaleiwag waseg natovek; awoum.

17 Magat bukukwakins sinap townen o bukukwates maʼawan, bo bukumwasaws yakamiy.

18 “Nag alivan livneimiy tababaws yakamiy; nag. Bweina akakin kalisiy yakamiy nadaweimiy; tage teitan bisilkodeig, Bukitab nilivnek mamagina:

‘Townen bo asekan ikamkwam, mo ipiyaveig.’

19 “Bo alivnek youd townen, vāgan igaw bikamat, mo bukusimounids waseg yey.

20 “Mounid adibakeimiy, guntakayob kal igaw beiw, kal yak bukatam waseg mtowen, mogo bukatam waseg yey; e, bukatam waseg yey, mogo bukatam waseg Tamag townen nikayabeig nam.”

Yeisuw ilivnek peinan teitan bisilkod

(Matiw 26:20-25; Mak 14:17-21; Luk 22:21-23)

21 Anilivan townen ikous, singay igeg nanon Yeisuw; idibakes, ilana, “Mounid adibakeimiy teitan yakamiy igaw bisilkodeig!”

22 Navamul mites ikakins sisiyas wasigeis ikabunikays, idokes kavel.

23 Yeisuw navamul yey, ases kadiykusan Yeisuw; peinan singay nisiwyoubug.

24 Saymon Pita iloukwam waseg yey vāgan bakatigan Yeisuw, balana, “Kavel townen bisilkodeim?”

25 Mapun asineikim kadiykusan wavtakon Yeisuw, akatimwālag, alana, “Tamwey, kavel townen?”

26 Yeisuw ilana, “Mtownen, basouw kan townen mo basek.” E, ikow kan kakit, isow, isek Yudas, mtowen Saymon Iskaliyot natun.

27 Yudas ikam kan towen, Seitan mo isiw wananon Yudas. Yeisuw mo idibek, ilana, “Muwotet towen nuwanaw kuwtel.”

28 Yakamey nakakamkwam nag kakakin silawun Yeisuw anilivan towen.

29 O peinan Yudas tamtakavatein mamoney, mwasanin gog idokes Yeisuw nikayeb Yudas vagan biymiyis kan, sagal silmanin, o adok money mwasanin bikow bisiwayoub tasimavs wasigeis.

30 Yudas ikam kan towen ikous; nuwanaw mo isap in watoulan. Bo iboug tonen.

Yeisuw nakaleiwag kweivaw

31 Yudas inoun, Yeisuw mo ilana, “Bo isap tutan yakawanag Gimgilitoun yey, o gamag mo biyakawanes Tamag, gunawotet silmanin.

32 Nuwanaw gog, Tamag yakawanan mo bisekeig yakawanag yey.

33 Budag yakamiy, tut kadiyakus sigwey yakamiy bitasesus; igaw mo bukuneveigs; bukunineivs nag. Mawan agulivan wasigeis min-Yudiy situwaweiks, alana, ‘Banoun ban; tamawan bukuwekeigs.’ E, nagein mo adibakeimiy mawan.

34 “Gunakaleiwag kweivaw asekeimiy, kadiloka bukusiwyoubus simsimiyas. Mawan nasiwyoubumiy, kadiloka mawan bukusiwyoubus simsimiyas.

35 Bukuvages mawan, gamag babaw mo bikakins gunavamul yakamiy, peinan misiwayoub simsimiyas wasigeis.”

*Ilivnek Pita bikayan**(Matiw 26:31-35; Mak 14:27-31; Luk 22:31-34)*

³⁶ Saymon Pita idibek Yeisuw, ilana, “Tamwey, ama-bukun?”

Yeisuw ilana, “Tut towen banoun ban; ta-mawan bukwabkunigs. Igaw tut wanakougwaw mo bukwabkunigs yey.”

³⁷ Pita ilana, “Tamwey, aveiyag wawun nagein na-ikadilokeig babkunim? Bo bakanig peinan yak.”

³⁸ Iw to Yeisuw, ilana, “Tabta bukukwanig peinan yey, ne? Mounid adibakeim, siwatoun bukwawayaneig, igaw gaboug waseg kolkolek mo beigel.”

14*Yeisuw mamagina kidenen Taman*

¹ Yeisuw ilana, “Awoum bikubukub nuwamiy yakamiy. Kusimounids waseg Yowbad; kadilok-vak bukusimounids waseg yey.

² “Tamag wanven bunatum babaw nisesus. Kukin gog nag, tabta badibakeimiy, ‘Ban bakatineg miven pinamiy yakamiy’? Tage peinan agulivan mawan, bo mounid.

³ “Ban bakatineg miven, igaw mo baw vagan kid bakaweimiy banaweimiy waganaven, sigwey yakamiy mo bitasesus.

⁴ Kukwakins ked towen banoy.”

⁵ Tomas mo idibek Yeisuw, ilana, “Tamwey, nag bakakakin ama-bukun. Ta-mawan bakakakin ked.”

⁶ Yeisuw ilana, “Yey miked yey; yey mikamounid yey; yey mikabmwamov yey. Kukin

kal sivinan binek Tamag, bweina beim waseg yey mo binek Tamag; ta-kweitan ked nises.

⁷ Magat bukukwakin yey, mo bukukwakin Tamag. Nagein gog kukwakins townen, peinan nukukines.”

⁸ Pilip ilana, “Tamwey, kwatimlakem Tamam mo beitout ninom.”

⁹ Iw to Yeisuw, ilana, “O Pilip, kadiveiyov tut sigwey yakamiy nitasesus, aveiyag wawun nag kukwakin yey? Kal yak kukineig yey, kukin-vak Tamag. Aveiyag wawun kulansa, ‘Kwatimlakem Tamam’?”

¹⁰ Tabta kusimounids yey Tamag waseg nases, o Tamag waseg yey nises? Livan townen nasekeimiy, nag agulivan tatoneig; Tamag anilivan; Tamag gog waseg yey nises, iwotet.

¹¹ “Bweina bukusimounids yey waseg Tamag nases, o kusimounids-vak Tamag waseg yey nises. Kukin gog nag, kadiloka kusimounids peinan kukines gunakawotet.

¹² Mounid adibakeimiy, kukin kal yak bukusi-mounid waseg yey, gunakawotet townen mo bukuwtel tawtoun waseg, son mukwawotet singaya tawtoun, peinan bo banek Tamag.

¹³ “Aveiyag bukunitougs yagag waseg mo bawtel, vagan kid gamag babaw mo biyakawanes Tamag.

¹⁴ Kukin bukuntougigs yagag waseg, mo bawtel mawan.

Yowbad Kululuwan igaw mo beim

¹⁵ “Kukin bukusiwyoubugs, kadiloka bukuvnases gunakaleiwag.

16 “Yey mo banitoug Tamag waseg vagan bisekeimiy Teitan bilabeimiy, mo bises bisigeg.

17 Kululuwan Mounid Townen, ansinap kamnat. Tamag nag bisekes Kululuwan Townen wasigeis gamag babaw; nag. Peinan tasiyas nag kadilok bikines o bikakins Kululuwan Townen. Yakamiy gog kukwakins, peinan wasigeis yakamiy Kululuwan Townen nukusesus simiy.

18 “Nag makaw bukusesus yakamiy, peinan yey bo baw.

19 Igaw kakit mo balakanig wasigeis ven watinow gimgilis, tage yakamiy bukukineigs yey. Yey bamov mapuna yakamiy bukumovs.

20 “Igaw, yam townen waseg, mo bukukwakins yey Tamag waseg nases, o yakamiy waseg yey, o yey wasigeis yakamiy.

21 “Kal yak bukuligen gunakaleiwag, o bukuvnas, mounid yak bukusiwyoubug. Kal yak bukusiwyoubug, Tamag mo bisiwyoubum yak; o yey mo basiwyoubum, tatoneiga bakamat waseg yakoum.”

22 Yudas Iskaliyot valeyin yagan Yudas; mtowen idibek Yeisuw, ilana, “Tamwey, aveiyag wawun bukukwamat wasigeis yakamey, tage gamag babaw nag?”

23 Iw to Yeisuw, ilana, “Kal yak bukusiwyoubug mo bukuvnas aygag; mapuna Tamag mo bisiwyoubum yak, soug Tamag bakawekeim yak mo bitasesus simey yakoum.

24 Kal yak bukupiyaveig mo bukupiyev aygag, Tamag aygan gog, nikatipel nisekeig agulivan, nikayabeig vagan kid basekeimiy aygan townen.

25 “Agulivan towen nasekeimiy, igaw sigwey yakamiy nitasesus.

26 Igaw Teitan biwekeimiy bilabeimiy, mtowen Kululuwan Yowbad. Tamag bo bikayeb Kululuwan, gunakaleiwag waseg, biwekeimiy; Kululuwan Townen mo bikatimlakeimiy youda babaw wasigeis; e, bilabeimiy vagan nag bukunumlaves agulivan babaw.

27 “Balisaweimiy, tage bweina beitaw nuwamiy; sinap bwein nasekeimiy vagan beitaw nuwamiy. Ven watinow sinapun nag bilabeimiy mawan agusinap, nag. Awoum bikubukub nuwamiy; awoum beivag amipwayat.

28 “Nukuliganes agulivan mamagina: ‘Banoun ban, bayum-vak baw.’ Magat bukusiwyoubugs bo bukumwasaws peinan yey banek Tamag, tage mtowen Tamag Tatawtoun singay.

29 “Nagein gog bo alivnek. Igaw bikamat mamagina, mo bukusimounids waseg yey.

30 Igaw nag balivan avakaein wasigeis yakamiy. Peinan bo neim takalwagein asisinap ven watinow gimgilis; tage ta-mawan bivkek waseg yey.

31 “Yey awotet mawan Tamag nikaliwageig, vagan kid gamaga babaw mo bikakins gunsiwayoub waseg Tamag.

“Kutamanaws bo bitanounas.”

15

Yeisuw kay mound yagan gleip

1 Kweitan livan Yeisuw nisekes mawan: “Yey mamagina kay mound; Tamag mamagina tawtelein bag.

² Kukin yayageig nag beivag anagin, Tamag mo bilav yayag townen bilev. Kukin gog beivag anagin, mo bibob matan vagan anagin bibabaw.

³ “Bo nasekeimiy agulivan, mapuna ivag amisi-
nap kamnat.

⁴ Makava yayagein, kukin wawun nag, ta-
mawan beivag anagin. Kadiloka bisesus son
wawun kay mo beivag anagin. O yakamiy
mawan. Kadiloka bitasesus simiy yey, o yey sig-
wey yakamiy, mo beivag angimiy; kukin bukus-
esusa makaw, bo nag.

⁵ “Yey kay yey. Yakamiy yayageig yakamiy. Kal
yak soug yey bitases, o yey soum yak, igaw beivag
anagim bibabaw; tage ammwānet nag aveiyag
bukuwtel.

⁶ “Kukin kal bipiyaveig, mtowen mamagina
yayageig ilaves in watoulān, bo biyālay, beimat.
Igaw gamag mo bikawes, bigabus wākov.

⁷ Kukin sigwey bitasesus, o gunakaleiwag simiy
bukusesus, aveiyag sivinamiy, bweina bukuni-
tous silmanin, mo bukubānes youd townen.

⁸ “Magat gunavamul moundid yakamiy, mo
bukuvages angimiy bibabaw; mapuna gamag
babaw mo bikavasis Tamag.

⁹ Tamag ikalpwakit waseg yey, mawan yey,
akalpwakit wasigeis yakamiy. Kadiloka kusesus
son agusinap siwayoub.

¹⁰ Kukin bukuvnases gunakaleiwag mo bukus-
esus son agusinap siwayoub. Mawan yey, avnas
Tamag nakaleiwag to nasesuna son townen ansi-
nap siwayoub.

11 “Bo asekeimiy agulivan towen, vāgan kid gunakabmwāsaw waseg bukusesus, o singay bi-vakaein mwāsaw wasigeis yakamiy.

12 Gunakaleiwag towen: Kadiloka bukusi-wyoubus simsimiyas. Peinan yey nasiwyoubumiy, kadiloka bukusiwyoubus simsimiyas bo māwan.

13 Kukin kal singaya bisiwyoubus nubein, mo bitam mwamovan, bikanig pines tasiyas.

14 “Magat bukwanawes aygag mo bukwanubeins waseg yey.

15 Kweiboug bo adokeimiy guntouwāt yakamiy; tut gog towen nadokeimiy nubeig yakamiy. Kalisiy tasiyas tamwey natouwats nag bikakins tamwey nanon; tage yey bo aligen mo akakin Tamag nanon, bo nakatipel nasekeimiy yakamiy.

16 Nag kuvkakeigs mitovek yey; tage yey bo avkakeimiy nubeig yakamiy; bo akaleiwag vāgan bukukwanawes aygag vāgan kid angimiy bwān-abwein bises bisigeg. Igaw aveiyag bukunitougs waseg Tamag, yagag yey waseg, Tamag mo bisekeimiy youd towen.

17 “Gunakaleiwag towen: Kadiloka bukusi-wyoubus simsimiyas.

Ven watinow gimgilis sikameiliw

18 “Magat ven watinow gimgilis bikamliweimiy, kadiloka bukunuways wanmugwana yey nikamliweigs.

19 Magat amisinap māwana asisinap tasiyas, mo bisiwyoubumiy. Tage yakamiy amisinap kweitan. Bo nadaweimiy mo nukulisawes ven

watinow asisinap, mapuna ven watinow gimgilis ikamliweimiy yakamiy.

20 “Kadiloka bukunuwes agulivan nadibakeimiy mamagina, ‘Natouwat nag bimug waseg natovek; nag.’ Kukin bikamliweigs, mogo bikamliweimiy. Kukin bivnases aygag, mogo bivnases agamiy.

21 Ven watinow gimgilis biyagageimiy, peinan agugwamag yakamiy, o peinan nag ikakins Townen nikayabeig nam.

22 Magat basinales, o magat nag basekes aygag, mogo nag badok asisinap kalbaleb. Tage bo anekes, asekes aygag, igaw Yowbad mo bikamtanis peinan asisinap kalbaleb, ta-mawan bikatimapus aygan; nag.

23 Kukin kal bikamliweig, mamagina bikamliw-vak Tamag.

24 “Magat nag bikines gunawotet tawtoun, nag badok asisinap kalbaleb. Tage gunawotet singay tawtoun. Nag teitan nawotet tawtoun mawana gunawotet tatoneig. Tage nikines gunawotet, mogo nikamliwemas soug Tamag.

25 Bo ikamliweigs vagan bikamat livaneig nises Bukitab kaleiwag waseg; nilivnek mamagina: ‘Bo ikamliweigs mav; silawun nag.’

26-27 “Igaw bakayeb Teitan beiw bilabeimiy. Kululuwan Townen ansinap mound, bo beinoy Tamag waseg biwekeimiy; livaneig mo bisekeimiy. O yakamiy gog livaneig bukusekes gamag babaw wasigeis, peinan sigwey yakamiy nitasesus nakabsilamaw gunawotet waseg ee... sigwey yakamiy tut townen.

16

1-2 “Livan townen bo adibakeimiy vāgan awoum bukupiyaveigs; igaw tasiyas bibwabwes mitapwaloul, sinagog waseg; o igaw kweitan tut wanakoug gamag mwasanin beiweimiy bukumtamats, o igaw biyagageimiy mo bidokes Yowbad bikalin nuwan tasiyas.

3 “Siwotet townen biwteles, peinan nag bikakins Tamag, o nag bikakins yey.

4 Bo adibakeimiy sinap townen; igaw youd townen bikamat mo bukunuwes agulivan nadibakeimiy.

Yowbad Kululuwan nawotet tonen

“Wanmugwana nag adibakeimiy sinap townen, peinan igaw sigwey yakamiy nitasesus.

5 Tut gog townen bo banek Townen nikayabeig nam, tage nag kal yakamiy ikatiganeig ilana, ‘Ama-bukun?’

6 Peinan nadibakeimiy sinap townen, mo igeg amnamiy.

7-8 “Mounid gog adibakeimiy, bweina bali-saweimiy. Kukin nag balisaweimiy, nag bakayeb Teitan bilabeimiy; tage bo ban, mogo Townen beiw, mo bikatimlakeimiy ven townen gimgilis babaw yakamiy, vāgan kid bukukwakins sinap kalbaleb, sinap bwein, o sinap kalbaleb mapun.

9 “Mtowen bikatiboug nuwes kalisiy nag bisimounids waseg yey, mo bikakins asisinap kalbaleb.

10 “Bikatimlakeimiy agusinap bwein peinan bo bamwen banek Tamag, o igaw nag bukukineigs.

11 “E, bikatimlakeimiy sinap kalbaleb mapun, peinan Tamag bo imop ansinap kalbaleb townen tanuwagan ven watinow.

12 “Sinap babaw nisesus, igaw mo badibakeimiy, nagein gog ninoumiy igaw moumouvit.

13 Igaw beim Yowbad Kululuwan Mounid, mo bimgwayeimiy sinap babaw mounid waseg. Nanon tatonen nag bilivan, nag. Aveiyag biligen, mo bilivan mawan; o bilivnek sinap wanakoug-waw silmanin.

14 “Mtowen bikow agusinap mo bikatimlakeimiy, vagan beivag yakawanag tatoneig.

15 Tamag navavag mamagina yey gunavavag, to nalivan, alana, ‘Mtowen bikow agusinap mo bikatimlakeimiy.’

Moumouvit beikous mo bukumwasaws

16 “Igaw kakit mo balisaweimiy; tut kakit wankuyeim mo bukukineigs vayuwein.”

17 Navamul mwasanin sisiyas mo illivans, ilansa, “Aveiyag anilivan townen, ‘Igaw kakit mo balisaweimiy,’ o ‘Tut kakit wankuyeim mo bukukineigs vayuwein,’ o ‘Bo banek Tamag.’ ”

18 Ilansa, “Aveiyag wawun anilivan, ilana, ‘Igaw kakit’; tage nag takakins silawun.”

19 Yeisuw gog ikakin aw-youid sivines bikatugwans waseg, to ilana, “Adok kuneves silawun agulivan townen, ‘Igaw kakit mo balisaweimiy’ o ‘Tut kakit wankuyeim mo bukukineigs vayuwein.’

20 Mounid adibakeimiy, bigeg ninoumiy, bukuvalams; tage gamag babaw bo bimwasaws. Mimouvit igaw mo bukwatilawos mwasaw.

21 Mamagina vin, tutan bitup, namouvit ivag; tage bitapouy naman, mo beikous namouvit, mo bimwasaw, peinan kweivaw gamag bo ikamat.

22 “Yakamiy manwan, tut townen mimouvit nises; igaw gog mo bawekeimiy, mo bukumwasaws bukusiagas. Ta-kal biyageg mimwasaw townen; nag.

23 “Igaw yam townen waseg, nag bukunitougs waseg yey. Mounid adibakeimiy, igaw bukuntougis Tamag, yagag yey waseg, Tamag mo bisekeimiy.

24 Tut kweiboug nag kweitan youd kuntougis Tamag, yagag yey waseg; nag. Kadiloka bukunitougs vagan bukukwawes, mo bivakaen mimwasaw yakamiy.

Bo atawtoun ven watinow nakaleiwag waseg

25 “Gunakabebay waseg bo adibakeimiy. Igaw kweitan tut beim, mo beikous kabebay; kamnat gog mo basekeimiy livanen Tamag.

26-27 Tut townen bukuntougis Tamag yagag yey waseg. Nag balivan, balana, ‘Banitoug Tamag waseg, pinamiy yakamiy’; nag. Tamag tonena nisiwyoubumiy, peinan nukusiwyoubugs yey, o nukusimounids manoy nam Yowbad waseg.

28 “Manoy nam Tamag waseg, nam ven watinow; igaw mo balisow ven townen watinow, bayum gog banek Tamag.”

29-30 Navamul mo ilansa, “Tut gog townen amlivan kamnat. Mukwabebay bo ikous. Kakakin-wan yakoum kukwakin youd babaw; nag kadilok teitan bikatiganeim; mapuna kasimounid mukunoy Yowbad waseg nukum.”

³¹ Iwage Yeisuw, ilana, “Tabta moundid bukuk-wakins, ne?

³² Igaw kweitan tut beim, adok tut towen bo isilamaw, bikatigayeimiy bukuneis wamiven tatineimiy, bukulisaweigs, agumwanet yey bases; tage amateiy soug Tamag bakases.

³³ “Sinap towen bo asekeimiy vagan bukusi-mounids waseg yey mo beitaw nuwamiy. Ven watinow mimouvit bukulivatus, tage awoum bigeg ninoumiy, peinan bo atawtoun ven watinow sinapun waseg.”

17

Yeisuw nakanitoug

¹ Yeisuw anilivan towen ikous, mo itamnow matan, ikin libalab, ilana, “Tamag, tutag bo neim. Kusekeig yakawanag, mo bavag gamag babaw biyakawaneims yak.

² “Bo nukutam agugwamag babaw vagan bayamoves mo bisigagas; o bo nukusekeig gunakaleiwag gamag babaw wasigeis.

³ “Kalisiy bikakinsa yakoum moundid Yowbad yakoum, o nukukwayabeig Mesay Yeisuw yey, mo nam, tasiyas kalisiy bikakins mawan mo beimovs bisigagas.

⁴⁻⁵ “Gunawotet towen nukusekeig bo ayakous, vagan ven watinow gimgilis mo biyakawaneims. Tut gog towen kusekeig yakawanag tatoneig walbalab wamatam. Mawan nitases nakabsilamaw tut waseg; e, vayuwein kusekeig yakawanag towen.

⁶ “Ven watinow gimgilis tasiyas nukusekeig, bo akatimlakes amsinap yakoum. Amgwamag

tasiyas nukusekeig agugwamag, o bo ikanawes aygam yakoum.

⁷ Nagein gog bo ikakinsa gunavavag tasiyas nukusekeig meinoy nimeis waseg yakoum.

⁸ “Livan townen nukusekeig, bo akatipel asekes tasiyas, mo itams waseg. E, ikakins-wan manoy nam waseg yak, o isimounids nukwayabeig nam.

⁹ “Nag banitoug ven watinow gimgilis pines; nag. Misinaka banitoug pines tasiyas nukusekeig, peinan amgwamag tasiyas.

¹⁰ Agugwamag babaw mamagina amgwamag yakoum; o amgwamag mamagina agugwamag yey, o yakawanag peinan.

¹¹ “Tut townen balisow ven watinow, mo baw; tasiyas gog bisesus ven watinow. O Yowbad, kadiloka yagam waseg bukuvnases gamag tasiyas nukusekeig. E, kuvnases tasiyas vagan beivag ninous katanok-wan, manwan nanoud yakid katanok-wan.

¹² “Tutag watinow waseg, sigwey tasiyas bo amtakavates gamag tasiyas nukusekeig; yagam waseg nisesus bwein. Nag kal iyamkwaneig. Misinaka townen Bukitab nilivnek peinan bo bigeg; e, mtowen anmwānet iyamkwaneig.

¹³ “Tut townen bo baw. Ven watinow waseg nasekes livan townen vagan bimwasaws avakaein, yey gunamwasaw avakaein waseg.

¹⁴ “Bo asekes amlivan, ven watinow gimgilis mo ikamliwes tasiyas, peinan idokes tobwag gamag tasiyas; o yey manwan, idokeigs tobwag gamag yey.

15 “Awoum bantougim bukutokes vagan bili-sawes ven watinow; nag. Misinaka kumtakavates, mata beivag asisinap kalbaleb.

16 Nag ven watinow gimgilis tasiyas; mawan yey, yey nag gimgeilin ven watinow.

17 Kuvages amgwamag bikamnat, amlivan mound waseg.

18 “Peinan nukwayabeig nam silmanin ven watinow, mawan yey akayabes tasiyas bineis silmanin ven watinow gimgilis.

19 Yey akatkileig vagan balabes tasiyas, vagan kid tasiyas bisesus bwein, asisinap mound waseg.

20 “Antougim pines tasiyas, sisiyas tasiyas babaw biliganes asilivan mo bisimounids waseg yey.

21 “Tama, anitoug vagan tasiyas babaw beivag ninous katanok-wan; mawan yak waseg yey, o yey waseg yak, nanoud katanok-wan; o sivinag si-dayas tasiyas beivag nanouds katanok-wan; ven watinow gimgilis mo bikakins nukwayabeig nam.

22 “Sinap kamnat nukusekeig, bo akatipel asekes tasiyas, vagan beivag ninous katanok, mawan yakid aditeiy.

23 “Yey sigwey tasiyas bakases, o yakoum soug yey; nakabiyokous waseg katanoka bod yakids babaw; ven watinow gimgilis mo bikakins nukwayabeig nam, o bikakins kukwalpwakit wasigeis tasiyas, mawana waseg yey.

24 “O Tama, sivinag tasiyas biwekeigs wadavanuys. Nakabsilamaw tut waseg nukusi-wyoubug gunakamnat waseg. Sivinag tasiyas bikines gunakamnat wadavanuys waseg.

²⁵ “Ven watinow gimgilis na-ikakins yak, tadidumwal yak, tage yey akakina yak, o amgwamag tasiyas ikakinsa nukwayabeig nam.

²⁶ “Bo akatimlakes yagam o amsinap; igawvak mo bakatimlakes amsinap tatoneim, vagan kid siwayoub towen nukusiwyoubug mo binekes tasiyas, o yey-vak basesuna wasigeis tasiyas.”

18

Iyousis Yeisuw

(Matiw 26:47-56; Mak 14:43-50; Luk 22:47-53)

¹ Anilivan towen ikous, Yeisuw mo inounas sen navamuls, iwloubus, ikanapels lay Kidlon, ikatulags, ineis bigulen oliv, isinis.

² Yudas, towen tasilkodein Yeisuw, ikakina Yeisuw sen navamul inineis ven towen.

³ Mapuna Yudas mo imgwayes takannaviys sisiyas tanuwgwes lun situwaweiks siplismans mwasanin, o Palisiy siplismans mwasanin; ikokews wodama, lampa, son naviy youdanen, inounas, ineis bag towen.

⁴ Yeisuw ikakin youd babaw igaw bilivet, iwage ilana, “Kal kunineves?”

⁵ Ilansa, “Gum-Nasalet yagan Yeisuw.”

Yeisuw ilana, “Yey.” Yudas gog siney tasiyas nitomos, mtowen tasilkodein Yeisuw.

⁶ E, iliganes Yeisuw anilivan, ilana, “Yey,” mo isineikiks, ikalkalouws, immasis wapwepway.

⁷ Ikous, itamanaws, vayuwein Yeisuw mo ikatiganes, ilana, “Kal kunineves?”

Ilansa, “Gum-Nasalet yagan Yeisuw.”

⁸ Iwage Yeisuw, ilana, “Bo adibakeimiy mtowen yey. Bukuyousigs yey, tabta bukutamēs tasiyas bineis wasiven; awoum kuyousis tasiyas.”

⁹ Yeisuw anilivan māwan vāgan bikamat livan towen Bukitab nilivnek mamagina: “Gamag tasiyas nukusekeig nag teitan iyamkwaneig, nag.”

¹⁰ Saymon Pita mo ikow napulut tanmunum, iweiy tanuwgwes-lun sitovek natouwat teitan, yagan Malkos, ibob teigan wanakatay.

¹¹ Yeisuw idibek Pita, ilana, “Kusem mupulut wakaban. Kadiloka bāmoum kwāvig yayan Tamag nisekeig.”

Yeisuw iyatal tanuwgwes lun sitovek avakaein wamatan
(*Matiw 26:57-58; Mak 14:53-54; Luk 22:54*)

¹² Takannaviy babaw sisiy sitovek, sisiyas min-Yudiy siplismans, mo iyousis Yeisuw, iyawanis naman.

¹³ E, itokes Yeisuw inawes wanamug Anas wanbunatum, tamwey towen Kayapas yawan; bweilim towen Kayapas tanuwgwes lun sitovek avakaein.

¹⁴ Mtownen Kayapas nidibakes min-Yudiy sitakaleiwag mamagina, “Kadiloka tatanok gamag bikanig peinads yākids, bod Yudiy yākids.” (Kukines Yon 11:50)

Pita ikayan Yeisuw

(*Matiw 26:69-70; Mak 14:66-68; Luk 22:55-57*)

¹⁵⁻¹⁶ Saymon Pita mo ikabwākuns Yeisuw waseg, son navamul teitan; mtowen veiyon tanuwgwes lun sitovek, mapuna isiws wanbunatum sen gamag tasiyas nitokes Yeisuw. Tage

Pita itamanaw iton wamatan bunatum. Mtowen veiyon tanuwgwes lun sitovek avakaein mo inek vin manawen ikayamat wakoukwed, ilivans son, mo ikaliyow koukwed vagan Pita beisiw beim.

¹⁷ Vin manawen mo idibek Pita, ilana, “Adok yakoum Yeisuw navamul teitan, ne?” Pita ilana, “Nag.”

¹⁸ Asiloulun; tasiyas tanuwgwes lun sitouwats sisiyas plismans mwasanin mo ivlakes kov, itamanaws ikammunuws kov walasin. Pita siney tasiyas ikammunuws.

Tanuwgwes lun sitovek avakaein ikatigan Yeisuw

(Matiw 26:59-66; Mak 14:55-64; Luk 22:66-71)

¹⁹ Tanuwgwes lun sitovek avakaein mo ikatigan Yeisuw, ilana, “Kalisiy muvumul? O aw-sinap waseg nukumulis tasiyas?”

²⁰ Yeisuw ilana, “Agusinap bo alivan kamnat, gamag babaw wasigeis, Yowbad wanbunatum o sinagog wasigeis. Sitapwaloul waseg min-Yudiy babaw nikatilutegs agusinap nakatimlakay; nag kweitan sinap akatimwalag o akawum; nag.

²¹ Aveiyag wawun kwatiganeig yey? Kwatiganes tanageins agulivan, tasiyas-nan; ikakinsa agulivan.”

²² Yeisuw ilivan ikous, teitan plisman wadadan nitamanaw mo iweiy Yeisuw, naman waseg, ilana, “Awoum kwatimop tanuwgwes lun sitovek anilivan manawan.”

²³ Yeisuw ilana, “Magat agulivan kalbaleb, kadiloka kwamtel aveiyag igeg. Kukin gog nag, aveiyag wawun nukuweig?”

²⁴ Yeisuw igawa iyawanis naman, Anas mo ikayeb vagan kid biyatal wamatan Kayapas, mtowen tanuwgwes lun sitovek avakaein.

Vayuwein Pita mo ikayan Yeisuw

(Matiw 26:71-75; Mak 14:69-72; Luk 22:58-62)

²⁵ Saymon Pita, igawa itamanaw ikammunuw kov; gamag mwasanin mo idibakes, ilansa, “Adok yakoum navamul teitan, ne?”

Pita ilana, “Nag.”

²⁶ Tanuwgwes lun sitovek natouwat nises, mtowen veiyon towen Pita nibob teigan; ilana, “Adok bo akineim wabag soum Yeisuw, ne?”

²⁷ Vayuwein Pita ikayan, ilana, “Nag.” Mo igel kolkolek.

Iyateles Yeisuw wamatan Paylat

(Matiw 27:1-2, 11-14; Mak 15:1-5; Luk 23:1-5)

²⁸ Iyateles Yeisuw wamatan Kayapas ee... walalayis. Ikous, mo inawes gabman avakaein wanbunatum bunavakaein. O peinan min-Yudiy ikatkakils sitapwaloul waseg, yam towen beikams Kaltuwon bulukwan lamiy, nag kadilok beisiws gabman Lom wanbunatum wanuwan.

²⁹ Mapuna Paylat isap in watoulan, idibakes, ilana, “Aveyag wawun bukuyateles taw towen?”

³⁰ Ilansa, “Kukin nag takalbaleb towen, nag bakamey waseg yakoum.”

³¹ Paylat ilana, “Mikaleiwag nises. Kunawes taw towen, kukwaleiwags waseg.”

Iweis min-Yudiy, ilansa, “Nag ivag makaleiwag vagan bakaweiy gamag.”

³² Min-Yudiy asilivan towen waseg mo ikamat livan towen Yeisuw nilivnek, peinan ilivan, “Beiweigs waklos.”

³³ Paylat mo iyum in wanbunatum, ilana, “Kukines Yeisuw beim.” Im to Yeisuw; Paylat mo ikatigan; ilana, “Tabta yākoum min-Yudiy siking, yākoum; ne?”

³⁴ Iw to Yeisuw, ilana, “Sivinam bukukwakin, ne? O adok min-Yudiy bo idibakeims livaneig towen.”

³⁵ Paylat ikatimop anilivan, ilana, “Yey nag gum-Yudiy, yey. Ambod tasiyas tanuwgwes lun nimayeims waseg yey. Aveiyag mukwalbaleb?”

³⁶ Yeisuw ilana, “Ta-ivag gunakabkaleiwag ven watinow; nag. Magat gunakabkaleiwag ven watinow, gungamag mo bikanaviys vagan min-Yudiy nag biyousigs. Tage nag; gunakaleiwag kweitanwan.”

³⁷ Paylat ilana, “Tabta king teitan yākoum, ne?” Yeisuw ilana, “Mawana nukulivan. Inag nikopweig wotet towen silmanin. Mapuna bo nam ven watinow vagan bakatimlakay sinap moundid. Kalisiy asisinap moundid mo biliganes aygag.”

³⁸ Paylat ilana, “Aveiyag sinap moundid?”

Min-Yudiy sivines beiweiyis Yeisuw

(Matiw 27:15-31; Mak 15:6-20; Luk 23:13-25)

Paylat ilivan ikous, vayuwein mo inek min-Yudiy, idibakes, ilana, “Nag aban ansinap kalbaleb waseg taw towen.

³⁹ Tage sagal towen Kaltuwon sinapun balik wadeil teitan baspuy bein wamnat. Sagal towen, kavel baspuy beiw? Takaleiwag yakamiy. Adok balik min-Yudiy miking baspuy beiw, ne?”

⁴⁰ Iwaks avakaein, ilansa, “Taw townen bises; tage Balabas beim.” Mtowen Balabas tavveinaw teitan.

19

¹ Paylat mo ikaliwages natakannaviys, vatul waseg iwaways wawon Yeisuw.

²⁻³ Iwaweiyis Yeisuw ikous, tasiyas takannaviy mo isiwakus anapay vatul kulikoul waseg, mamagina douidiw, isenas wakunun, ivaskomis kweim bwabwel waseg, ikululs wamatan, ilansa, “Kalin nuwem min-Yudiy siking yakoum”; isibaweswan; nimes waseg iwaweiyis.

⁴ Vayuwein Paylat mo in watoulan, idibakes min-Yudiy, ilana, “Kukines gamag townen namey wasigeis yakamiy; kadiloka kukwakins nag aban ansinap kalbaleb waseg.”

⁵ Yeisuw mo isap, anapay kulikoul, anakweim bwabwel, Paylat mo idibakes, ilana, “Kukines gimgilitoun townen.”

⁶ Tanuwgwes lun situwawek sisiyas siplismans ikines Yeisuw, mo iwaks, ilansa, “Kwatimates waklos!”

Paylat ilana, “Yakamiy kutokes, kunawes, kuweiyis; yey nag; nag aban ansinap kalbaleb.”

⁷ Tasiyas Yudiy gimgilis mo ilansa, “Peinan taw townen anilivan, ilana, ‘Yey Yowbad Natun yey,’ kadiloka bikanig. Makaleiwag mawan.”

⁸ Paylat iligen asilivan townen, singay ivag anwayat.

⁹ Iyum in wanbunatum wanuwan, idibek Yeisuw, ilana, “Avanuy mukunoy nukum?” Tage nag ikatimop anilivan, isesuna ikikapay.

¹⁰ Paylat mo ilivan, ilana, “Bo kukwapway ne? Tabta kukwakin yey takaleiwag. Bakaleiwag balikum, o nag, bukukwanig waklos?”

¹¹ Iw to Yeisuw, ilana, “Misinaka Yowbad beitam aveiyag bukunuwakeig. Kukin gog nag, bo nag. Bukuweig, sinap towen kalbaleb, tage mtowen nimayeig waseg yak, ansinap towen singay kalbaleb.”

¹² Paylat iligen Yeisuw anilivan ikous, mo iyokon vagan bilik; tage min-Yudiy iwkuwaks, ilansa, “Kukin bukulik taw towen, Sisal mo bigeg nanon. Peinan taw towen anilivan, ilana, ‘Yey king yey,’ mamagina isilponay Sisal nakaleiwag waseg.”

¹³ Paylat iligen asilivan, isin kabkaleiwag kabanen waseg, waven towen ag-Ibliw waseg idokes Gabat, peinan dakul babaw nisesus wavtakon ven, mo imey Yeisuw vagan bikaleiwag waseg.

¹⁴ Bo iyanay yam towen bikatunags silmanin Kaltuwon sigeilin nubweig. Paylat mo idibakes min-Yudiy, ilana, “Kukines miking.”

¹⁵ Tasiyas gog iwkuwaks, ilansa, “Kunawes taw towen, kwatimates waklos.”

Iw to Paylat, ilana, “Tabta baweiy miking, ne?”

Iweis tanuwgwes lun, ilansa, “Making anmwānet Sisal.”

¹⁶ Wankuyeim Paylat mo itam Yeisuw vagan binawes beiweiy waklos.

*Ikatikavates Yeisuw waklos
(Matiw 27:32-44; Mak 15:21-32; Luk 23:26-43)*

17 Itokes Yeisuw, isekes anklos vāgan bikow binow ven to yagan Busabwes (Ag-Ibliw waseg idokes Golgot.)

18 Ven townen waseg mo ikatikavates Yeisuw, ikayagweg waklos. Asteiy ikatikavates ikayagwews wasiklos, teitan palatan, teitan palatan, Yeisuw gog wanuwein.

19-20 Paylat ilel livānen, isen wakunuwatan klos, mamagina, “Gum-Nasalet Yeisuw, min-Yudiy siking.” Nileles gog ag-Ibliw waseg, aga-Lom waseg, o aga-Gilis waseg; min-Yudiy singay babaw ivinis, peinan ven townen kadilakus Yelusalem.

21 Min-Yudiy babaw mo ivnivins lelel townen: “Min-Yudiy siking,” mapuna tasiyas tanuwg-wes lun situwāvek mo idibakes Paylat, ilansa, “Awoum kulel: Min-Yudiy siking. Tage kadiloka kulel: Taw townen anilivan, ilana, ‘Min-Yudiy siking yey.’ ”

22 Paylat ilana, “Nag; to nalel bo bisesuna, bisigeg.”

23-24 Tasiyas takannaviy ikatikavates Yeisuw ikous, mo ikawes anakweim, ilagus kalguvas; katanok katanok mo ikawes asikweim. Anakweim mwaynavakaein mo iyousis, ilansa, “Awoum bitabwabwes maynawen kweim, peinan aniwniwoun katanok-wan; ta-ivag ankatuvas. Bitalaves youd kweitan, makav bikalouw bein wapwepway, takines kal nakabivatus biton, townen mo bikow anakweim. Sona bikow. Awoum bitabob.”

E, ivāges māwan vāgan bikamat lelel townen Bukitab nilivnek mamagina.

“Ilagus agukweim, ikokews asikweim;
makava mo ilaves kweitan youd,
idokes kal bikow agukweim tonen.”

Mapuna takannaviys ivages mawan.

²⁵ Yeisuw anklos walasin itowas inan Meliy, son inan kweitan, sisiy Kilopas nakwav yagan Meliy, sisiy vinen-Magdal yagan Meliy.

²⁶⁻²⁷ Yeisuw ikines inan son navamul teitan nitatos, mtowen singay isiwayoub waseg, mo idibek inan, ilana, “Inag kukin natum townen.” Mo idibek navamul, ilana, “Kukin inam.” Nava-mul iligen, tut townen waseg mo itok ineis wanven, imlavag inan tonen.

Yeisuw ikanig

(Matiw 27:45-56; Mak 15:33-41; Luk 23:44-49)

²⁸ Wankuyeim Yeisuw mo ikakin nawotet bo ikous, ilana, “Agudak! Ta-mawan!” (Peinan Bukitab kweiboug nilivnek mamagin.)

²⁹ Kwavitan kwavig wayn yayan nises; yotout ikawes, isenas wakwavig, ibasis kaligweg yagan yisop wamatan, iyaseles, isekes Yeisuw, imoum.

³⁰ Wankuyeim, ilivan, ilana, “Bo ikous!” Itagud kayon, mo ikanig.

Ibes viligan Yeisuw

³¹ Yam townen iyouluks, ikatunags peinan nubweig Sādad townen mamagina Sābat, sagal Kaltuwon waseg; singay ikayuses mamagina siSābat avakaein; mapuna min-Yudiy initougs waseg Paylat vāgan takannaviys bikatupwes kikeis tasiyas ikayagwegs wasiklos, mo beimats, bikawes bilavewas. Awoum takanigs bikayagwegs ven walasin nubweig to Sābat waseg.

32-33 Mapuna takannaviy inekes teitan ikayagweg waklos, ikatupwes kaken, ikanig; ikous, mo inekes teitan ikatupwes kaken, ikanig; ikous mo inekes Yeisuw, ikines nanawan bo nikanig, to nakatupwes kaken, nag.

34 Misinaka takannaviy teitan ikow nakayal, ibes viligan, ilatay buyav son yevagam.

35 Yey atamanaw townen akakin, agulivan moundid peinan bo akin wamatag; agulivan townen asekeimiy vagan kid bukusimounids yakamiy.

36-37 Kweiboug Bukitab nilivnek mamagina:
 “Awoum bikatup tatuwan tonen.”

Kweitan livan nises:

“Bo bikines townen nibasis.”

E, takannaviy ivkakes mawan vagan bikamat Bukitab livanen Yeisuw silmanin.

Itakus Yeisuw

(Matiw 27:57-61; Mak 15:42-47; Luk 23:50-56)

38 Gum-Alimatiy teitan yagan Yosep, kweiboug isimounid Yeisuw waseg, tage nag ikamat, peinan anpwayat min-Yudiy situwaweks wasigeis. Townen Yosep nag sivilinan Yeisuw won tasiyas takannaviys bilaves mav, to initoug waseg Paylat, mo itam Yeisuw won, isek; Yosep ikow inow.

39-40 Nikodimos mo inek Yosep, kweiboug nikaypuls son Yeisuw, boug waseg. Nikodimos imey kaybuy singay avakaein vagan won Yeisuw nag beipwas, mouvitan magina sinwavas kilos; mul son alow nisesus wanuwan kaybuy townen. Kaybuy son itabwes won Yeisuw, iyawanis kweim pwapwakaw waseg, mawan asigulagul tasiyas min-Yudiy.

⁴¹ Walasin ven towen neiweiys Yeisuw, bag kweitan nises, o bag wanuwan alawag kweivaw; kweiboug nag teitan takanig isenas, nag.

⁴² Peinan kadiyakus siSabat avakaein, o peinan alawag towen kadiyakus nises, to inawes Yeisuw, itakus.

20

Yeisuw ikit vayuwein

(Matiw 28:1-10; Mak 16:1-8; Luk 24:1-12)

¹ Wik kweivaw nakabsilamaw waseg, walalayis, kakit mo beikous dadub, vinen Magdal, yagan Meliy, in wakalawag, iban dakul bo iyatpinis wawadon, in wadadan.

² Meliy isawl, inekes Pita son Yeisuw navamul towen singay isiwayoub waseg, idibek tasiyas, ilana, “DaGuyaws alawagan makaw. Bo ikawes, inawes; nag kakakin, seik avanuy misekeyas.”

³ Pita iliganes anilivan, son Yeisuw navamul tayuwein, mo isaps bineis wakalawag.

⁴⁻⁵ Isisawls ee... son itamap, Pita ikuyeim.

Towen nitamap in wakalawag itapop, ikin alawag wanuwan, tibutobwa mav; tage nag isiw wanuwan.

⁶⁻⁷ Wankuyeim Saymon Pita inek, isiw in wanuwan, ikin tibutob palatan; ikin maynatan kweim niyawanis wakunun sinkatupum imasis palatan.

⁸ Towen nimug nein wakalawag mo isiw in, ikin, isimounid.

⁹ Peinan bo itagouwawes Bukitab nilivnek Mesay beikit kanig waseg.

10 Tasiyas inavamul asteiy mo iyums ineis wawiven.

*Nen-Magdal yagan Meliy ikin Yeisuw
(Mak 16:9-11)*

11-13 Meliy gog itamanaw wadadan alawag, ivv_ulam. Igawa ivv_ulam, itapop ikin wanuw_un, ikines min-lib_ulab asteiy, asikweim pwapw_ukaw, isinis nakabmasis Yeisuw, teitan wakunun, teitan wakaken; ikatig_unes Meliy, ilansa, “Aveiyag wawun kuvv_ulam?”

Ilana, “Peinan guntovek bo inawes; nag bakakin seik avanuy misekeyas.”

14 Ilivan ikous, itouvin, ikin Yeisuw nitet; tage nag biwtus Yeisuw.

15 Yeisuw ikatugan, ilana, “Vin yakoum, aveiyag wawun kuvv_ulam? Kal kuninineiv?”

Wananon idoki townen tawtelein kid bag, ilana, “O tamwey, magat bo kukow, kunow, kadiloka kudibakeig avanuy mukusekey, yey mo ban bakow, bamey.”

16 Yeisuw ilana, “Meliy!”

Itouvin, iwtus, ilana, “O, guntovek!” (Ages tasiyas “Labonay”; aga-Muyuw gog “Guntovek.”)

17 Iw to Yeisuw ilana, “Awoum kwabikon wawoug; awoum. Peinan nag anek Tamag; igaw wankuyeim mo bamwen banek. Nagein kun kudibakes budag agulivan mamagina: ‘Yey bo bamwen banek Tamag, Timamiy, mtowen gunaYowbad, miYowbad, daYowbads babaw yakids.’ ”

18 Vinen-Magdal manawen Meliy mo inekes inavamul Yeisuw, ilana, “Bo akin datoveks”; mo ikamtel youd babaw to nilivan.

*Isap inavamul wasigeis**(Matiw 28:16-20; Mak 16:14-18; Luk 24:36-49)*

¹⁹⁻²⁰ Yam townen kwayav Sabat, inavamul Yeisuw nisesus wasibunatum. Awkwedan bo ikatibog, peinan iwenes min-Yudiy situwawek.

Yeisuw mo isap, itoun wanuwein, ilana, “Beitay nuwamiy yakamiy!”; ikatimlakes naman, viligan.

Bo ibwein ninous tasiyas, peinan ikines sitovek, bo imwawasaws seikwan.

²¹ Vayuwein gog mo ilivan, ilana, “Beitay nuwamiy yakamiy. Tamag nikayabeig, mawan bo bakayabeimiy.”

²²⁻²³ Ilivan ikous, ipwayik wawous tasiyas, mo ilana, “Yowbad Kululuwan biwekeimiy. Kalisiy asisinap kalbaleb bukulavewas, bo bisiw bisigeg. Magat bukulivans bisesus wasigeis, bo bisesus.”

Tomas nag isimounid

²⁴ Yeisuw nisap nilivan mawan wasigeis inavamul tasiyas sinwatan; teitan gog Tomas nag ises wasigeis. Tomas yagan kweitan Papap.

²⁵ Wankuyeim Tomas inekes tasiyas sinwatan, mo ilansa, “Bo nakakin datoveks.”

Tomas gog idok kid iyaweids, ilana, “Magat bakin naman pwapwat mulin, bakawgil didig waseg, o viligan bwabwagan kayal bakawgil namag waseg, mo basimounid. Kukin gog nag, bo nag.”

²⁶⁻²⁷ Yam kweinim kweitoun ikous, inavamul vayuwein ikatuyouns wasibunatum wanuwan nisesus; e, Tomas sisiy nisesus. Yeisuw isap, koukwed katibog kid, itoun wanuwein, ilana, “Beitay nuwamiy yakamiy.” Mo idibek Tomas,

ilana, “Kukin namag, viligag; namam kwabkwen, mo kusimounid; awoum kusesuna mav.”

²⁸ Iwage Tomas ilana, “O guntovek, gunYowbad yak.”

²⁹ Yeisuw ilana, “Tayyaweid yakoum Tomas, kukineig mo kusimounid peinan bo akit. Tasiyas gog nag ikineigs, o singaya ge isimounids waseg yey, bwanabwein tasiyas adok bimwasaws.”

Silawun buk townen

³⁰ Yeisuw nawotet tawtoun singay babaw; navamul yakamey nakakin. Kweiyuy nalel nises wabuk townen; babaw nises.

³¹ Bo alel tasiyas vagan bukuvinis o bukuli-ganes, mo bukusimounids peinan Yeisuw Mesay, Yowbad natun tonen. Bukusimounids yagan waseg mwamovamiy mo bukubanes.

21

Yeisuw isap wasigeis navamul teinim teiy

¹ (1,14) Yeisuw ikit kanig waseg, sivay isap in-avamul wasigeis; sivitounun mo isap mamagina:

Yevagam katiboul wanawoud yagan Tibelijas. Yeisuw inekes navamul wadadan yevagam townen.

² Tasiyas katanok bod nisesus, Saymon Pita, Tomas (mtowen idudouws Papap), Nataniyel (mtowen naven Ken, wawnuwan Galiliy), sisiy Sebidiy nitun, sisiy Yeisuw navamul asteiy.

³ Saymon Pita mo ilana, “Ban agileloud.”

Tasiyas ilansa, “Simey yak bitaneis.”

Inibwis siwag, ikalavis, igilelouds ee... iyam. Ta-kweitan in ikwanes. Makaw-wan.

⁴ Walalayis Yeisuw iton wakawalaw; tage navamul nag iwtusis.

⁵ Yeisuw idibakes, ilana, “Tawaw! Tabta amiyin?”

Ilansa, “Nag. Makawan!”

⁶ Yeisuw ilana, “Kweitan saw kulaves wamikatay, mo bukukwanes in.”

Ilaves wot in, mo ikwanes asiyin; nag bikawes, peinan singay babaw. Ta-mawan bidagis in wanuwan wag.

⁷ Yeisuw navamul towen isiwayoub waseg, mo idibek Pita, ilana, “Mtowen datoveks.” Saymon Pita sona mwadoyan iwwotet, ikakin mtowen natovek, mo isikam anakweim, inuw wayevagam, igay.

⁸ Yeisuw navamul tasiyas wawag ikalavis ineis wanakaew, isilbiteilis wot peinan bo ikalawt in; nag bikadiveiyov mo italags.

⁹ Ineis wanakaew ikines kov son in bo ikamen, son bled.

¹⁰ Yeisuw idibakes, ilana, “In towen nukukwanes, kumeyes mwasanin.”

¹¹ Saymon Pita mo itow in wawag, iyous wot, ibiteil in wanakaew, bo ikalawt in kavkaveks lakatutan sinwanim mwanatoun. Tage nag ikayboulis wot; bwein-wan.

¹² Yeisuw idibakes, ilana, “Kumeis, kukwams.”

Nag kal bikatugan, bilana, “Kavel yak?” Aspwayat bikatiganes. Ikakins gog sitovek towen.

¹³ Yeisuw im, ikow bled, ivgen isekes; in-vak mo isekes mawan; ikams.

¹⁴ (-)

Kumtakavates aleig sip

15 Ikams ikous, Yeisuw mo idibek Saymon Pita, ilana, “Yon natun yak. Tasiyas isiwyoubug. Tabta yakoum singay bukusiwyoubug, ne?”

Pita ilana, “Mounid; guntovek yak, kukwakin asiwyoubum.”

Yeisuw ilana, “Kumtakavates aleig lamiy.”

16 Sivyuwein Yeisuw idibek Saymon, ilana, “Yon natun yak, tabta bukusiwyoubug, ne?”

Pita ilana, “Mounid; guntovek yak, kukwakin asiwyoubum.”

Yeisuw ilana, “Kumtakavates aleig sip.”

17-18 Sivtounun Yeisuw idibek Saymon, ilana, “Yon natun yak, tabta bukusiwyoubug, ne?”

Pita mo igeg nanon, peinan Yeisuw nilivan sivtounun, ilana, “Tabta kusiwyoubug?”; to ilana, “O guyaw, youd babaw kukwakin; kukwakina asiwyoubum.”

Yeisuw ilana, “Kumtakavates aleig sip. Mounid adibakeim, igaw wagwadim nukusikam amkweim, nukuninoun ampalawen sivinam. Igaw bukutovek namam bukudimwes, soum teitan biyawen amuwat, bivakabanim binaweim palatan nag ivag sivinam.”

19 Yeisuw anilivan towen vagan bikamtel amawan Pita bikanig, yakawanan Yowbad silmanin. Ikous, mo ilana, “Kwabkunig.”

Yeisuw navamul towen singay isiwyoub waseg

20 Pita itouvin ikin Yeisuw navamul teitan ikabwakun waseg, mtowen singay isiwyoub waseg, o kamkwam waseg nisineikim kadiyakus wavtakon Yeisuw nikatimwalag, ilana, “Tamwey, kal towen bisilkodeim?”

²¹ Pita ikin navamul towen, idibek Yeisuw, ilana, “Taw towen, aveiyag bilouvat?”

²² Yeisuw ilana, “Kukin ba_uta_m va_gan mtowen bisesuna ee... mo ba_yum ba_m, awoum bigeg nanoum. Misinaka kwabkunig.”

²³ Yeisuw nagamag iliganes livan towen, idokes kid taw towen nag bikanig; tage Yeisuw na-ilivan, “Mtowen nag bikanig”; nag. Misinaka ilana, “Kukin ba_uta_m va_gan mtowen bisesuna ee... mo ba_yum ba_m.”

²⁴ Yeisuw navamul mtowen nikatimlakeids youd tasiyas, nilel nein wa_buk; takakins-wan anilivan bo moundid.

²⁵ Wotet babaw Yeisuw niwtel. Kukin teitan bilel nawotet babaw bein wa_buk, adok ven watinow mo bikalawt buk maynsiyas, tage igawa bilelel.

xcv

KALEIWAG KWEIVAW
The New Testament in the Muyuw Language of Papua
New Guinea
Nupela Testamen long tokples Muyuw long Niugini
Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

517ae3da-6769-54e8-8afd-7d53f958558c